

MOLIMO MOSANTO EZALI NINI?



...mpasi mpo na liyangani. Liyangani oyo ekokesena mwa moke na mayangani oyo tozalaka na yango na momesano awa. Mbala mingi, ntango nyonso oyo tosanganaka awa, ezalaka liyangani mpo na... mpo na lobiko ya babeli mpe mpo na bosenga ya nzoto. Wana nde tobetaka sete. Kasi na mpokwa oyo, tobandi kolamukisa oyo mpo na kobikisama ya elimo, ya—ya molimo ya moto.

Ata bongo, soko Nkolo alingi, mokolo ya Lomingo na ntongo, na eteyelo ya Lomingo, mokolo ya Lomingo na ntongo, tokobondela mpo na babeli mpe tokozala na molongo ya lobiko na nzoto lokola momesano, na mokolo ya Lomingo na ntongo, soko Nkolo alingi. Mpe na bampokwa ya mpóso oyo, tozali na mposa makasi ya kolobela makambo ya Seko mpo na—elimo.

² Sikoyo, toyebi ete soko nzo—nzoto ebikisami, yango epesaka biso nyonso esengo, mpo toyebi ete etalisaka polele ete Nzambe na biso abikisaka babeli. Kasi mobeli yango, soko atikali na bomoi ntango molai, ntango mosusu akobela lisusu, mbala mosusu na bokono moko oyo abikisamaki na yango, kasi yango ekolongola lobiko na nzoto te. Monganga akopesa nkisi mpo na bokono bwa mpanzi, mpe ntango mosusu mikolo mibale nsima akokufa na bokono bwa mpanzi nsima na ye koloba ete abikisamaki na yango. Ekozonga lisusu. Kasi ntango elimo wana ebikisami, na ntango wana, ozali na Bomoi ya Seko na kati na yo.

³ Mpe nazondima ete tokómi mpenza pene na Boyei na Nkolo Yesu, ete esengami na biso kosala nyonso oyo tokoki mpo na komema milimo nyonso na Bokonzi, mpe komema Bokonzi epai na bato, mpo tókoka kobikisama na milimo na biso. Nandimi ete nzoto ya Yesu ezali nzoto ya kobela koleka oyo ngai nayebi; elingi koloba, nzo—nzoto, nzoto ya molimo ya Klisto, na mokili, ezali kobela makasi.

⁴ Sikoyo, tozókána kokanga bino ntango molai mingi te, na mpokwa nyonso, mpamba te na mpokwa ya liboso, tozali na esika ya kofandisa baninga na biso ya bolingo te. Tozali kolengela kotonga ndako—a-nzambe ya sika, tabernacle monene kaka awa, na bisika oyo, to na esika nyonso oyo Nkolo akokamba; kasi na boyebi na biso, ekozala awa.

⁵ Sikoyo, tosili kopesa liyebisi ya mayangani, kobanda mokolo ya Misato kino mokolo ya Lomingo. Kasi na nsima, mokolo ya Lomingo, ekozala nsuka na bopémi ya Noele, kasi e... na ntango nyonso oyo Nkolo akoyebisa biso ete tótika, ekozala ntango yango. Toyebi mpenza te mbano na yango ekozala nini. Kasi, tozondima ete bato awa na tabernacle, ná balosambo ya bondeko na biso (oyo ezali, moko na yango ezali—ezali tabernacle ya

sainteté na Utica, esika Ndeko Graham Snelling azali mobateli, mpe na New Albany, esika Ndeko—Ndeko Junie Jackson azali mobateli, mpe lisusu na nzela monene, esika Ndeko Ruddell azali mobateli), biso mpe bango bazali ba-losambo ya bondeko na tabernacle oyo, tozali komeka komema ba...bato na biso na bondeko ya malamumu koleka elongo ná Klisto. Yango nde ntina na biso. Na bongo, naponi kotánga mpe kolakisa, na mwa bam-pokwa oyo ekolanda, . . .

⁶ Na mpokwa oyo, nalingi kolobela likambo ya: *Molimo Mosanto Ezali Nini?* Mpe lobi na mpokwa, nalingi koteya likoló na: *Epesamaki Mpo Na Nini?* Mpe mokolo ya Mitano na mpokwa . . . Mpe, mpo na basáli ya ba-bande, nalingi te oyo ya mokolo ya Mitano na mpokwa étiana na bande: *Ndenge Nini Nakozua Molimo Mosanto?* mpe *Nakoyeba Ndenge Nini Ntango Nazali Na Yango?* Na nsima tokotika kaka, nsima tokomona eloko oyo Nkolo akokamba biso na yango, mpo na mokolo ya Mpóso mpe ya Lomingo. Mpe mokolo ya Lomingo na ntongo, ekozala losambo mpo na babeli, mpe losambo mosusu ya kopalanganisa Nsango-malamumu mokolo ya Lomingo na mpokwa.

⁷ Sikoyo, tolingi ete moto nyonso áyeba ete . . . Mpe nayebi masini ya bande ezali kosala mosala na eteni ya ndako na nsima, mpe tolingi koloba boye. Mpo ete, na mayangani lokola oyo, ya lolenge ya kopalanganisa Nsango-malamumu, tozalaka na bato kouta na ba-denomination ya mangomba ndenge na ndenge, oyo balakisámá na lolenge ya kondima na bango moko, moko na moko. Mpe ezali malamumu. Nalingaka ata moke te kokweisama na kokóna kozanga boyokani katikati na bandeko. Mpe libanda na mayangani, nateyaka kaka Bosolo minene ya Nsango-malamumu na Makomi, likoló na makambo oyo bandeko oyo babongisaka mayangani na ngai bandimaka. Kasi, awa na tabernacle, na—nalingi koloba likoló na oyo tondimaka. Na yango, soko o—soko bososoli yango te, nakosepela mpenza kozua mwa mokanda to mwa nkomá kouta na bino, mpo na kotuna ngai motuna ya—ya mpo na nini tondimaka yango lolenge wana. Mpe nakozala na esengo komeka kolimbola yango na makoki na ngai nyonso.

⁸ Boyebi, lingomba nyonso, soko bozali na mateyo te, bozali lingomba te. Bosengeli kozala na eloko moko oyo botelemi likoló na yango, mwa malako oyo bosimbaka. Mpe etali te epai wapi moto asámbelaka to azalaka na denomination nini, soko moto yango abótámi na Molimo ya Nzambe, wana azali ndeko na ngai ya mobali to ya mwasi, ézala ata . . . Tokoki kokesana na makambo mosusu, ndenge ésti ezali mosika na wésti, kasi tozali kaka bandeko. Mpe nakosala eloko moko te bobele komeka kosunga ndeko yango mpo na kotambola malamumu mingi mpe pene koleka, ná Klisto. Mpe nandimi ete Moklisto nyonso ya solo, ya solosolo, akosala ndenge moko mpo na ngai.

⁹ Sikoyo, nasengaki na tabernacle oyo . . . Sikoyo, tozali kokóta

na likambo oyo te kaka mpo na kolekisa ntango na losambo. Nalingi kokóta na likambo oyo, mpe nalingi ete bino, mpe nasengi na bino, ete bótumba gbagba nyonso oyo ezali nsima na bino, mpe bóbongisa lisumu nyonso, mpo tókota na likambo oyo ná nyonso oyo ezali na mitema mpe na bomoi na biso. Tosengeli koya awa na ntina kaka moko ya kobongisa milimo na biso mpo na Boyei na Nkolo, mpe mpo na ntina mosusu te. Mpe lokola nalobaki mpe nasololaki, ete ntango mosusu na ntango moko boye, nakoki kolakisa to koloba likambo moko oyo ekoki kokesana mwa moke na oyo ya moto mosusu, lolenge oyo bango bandimaki yango. Na—na—naye mpo na kotia ntembe te, bomoni, na—naye. . . Tozali awa mpo na kolengela Boyei ya Nkolo. Mpe nakanisi ete etónga moke oyo. . .

¹⁰ Nazali na mwa bandeko bapaya elongo ná ngai awa, oyo nayebi, bauti na bisika ndenge na ndenge, mpe tozali na esengo ya koyamba bango. Mpe na ntembe te, na eyanganelo mobimba kuna, ezali na bamosusu oyo bauti libanda na engumba, kouta na bingumba ya mike zinga zinga na biso awa. Mpe tozali na esengo ya koyamba bino, mpe tosepeli mpenza na bino, soko bolingaka biso mingi mpo na koya koyoka makambo oyo. Nzambe. . . Tika ete bózonga na bisika na bino, ndeko na ngai mobali, ndeko mwasi, ná nkita ya bozui ya koleka oyo Nzambe akoki kosopa na motema na yo, nde libondeli na ngai.

¹¹ Mpe, mpo na tabernacle moke oyo, komona ete nandimaka ete bamoko na bato ya malamú koleka oyo nandimaka ete bazali na mabelé, basámbelaka na tabernacle oyo. Sikoyo, nalobá te bato “nyonso” ya malamú koleka. Nalobaki bamoko ya bato ya malamú koleka na mabelé basámbelaka na tabernacle oyo. Kasi lokola mokolo na mokolo, ntango nazongaka awa, kouta na liyangani moko kino na mosusu, namonaka bosenga monene ya tabernacle oyo, bosenga monene kati na yango, mpe ezali mpo na kotondisama, to kobulisama, bomoi ya bozindo koleka, kotambola pene koleka ná Nzambe. Mpe nalakaki bango ete nakosala yango, koteya Mateya oyo mpo na bango. Mpe tozali na esengo ya kozala na bino na kati mpe kosangana na bondeko ná biso zingazinga na Liloba ya Nzambe, wana tozolakisa mpe tozomeka kotalisa yango polele.

¹² Sikoyo, na mpokwa misato ya liboso, tokozua mokonza ya koteya te, kasi Nsango ya malakisi longwa na Liloba ya Nzambe.

Sikoyo, mpo na yango, nakolinga te kosenga na moto moko ete ásala eloko moko oyo ngai moko nakosala te. Mpe mpóso oyo ezalaki mpenza Kalvari mobimba mpo na ngai. Nakomaki mpenza pene ya—ya kobungisa makanisi, ndenge nakoki koloba yango, kino nazalaki lisusu mpenza ngai te. Kasi natikaki mpenza mokano nyonso, mpe makambo nyonso oyo nayebi, epai na Nkolo.

¹³ Butú mosusu wana, mwa moke nsima ya midi ya butú,

ngai ná mwasi na ngai, nsima ya kofanda, mpe kobondela mpe kosolola na Nkolo, na ngambo moko mpe mosusu ya mwa ebóngá na . . . eteni ya liboso ya ndako na biso, ná Biblia mibale ya kofungwama, tomibulisaki lisusu epai na Nzambe, mpo na kosala mosala na mobimba, ete tokotika mikáno na biso moko, ná makambo nyonso, ná makanisi nyonso ya mabe, mpe kosalela Nkolo Yesu.

Mpe natii motema ete ezalaki mpe lolenge na bino, ete bosalaki ndenge moko. Na bongo, ntango tozali koya na mpokwa oyo, tozali koya na mabelé ya bulee, katikati na bato oyo bazalaki kobondela, mpe kokila, mpe kobongisa makambo, mpe komiléngela mpo na kozua eloko moko longwa na Nzambe. Mpe nayebi ete ye oyo akoya na nzala, akozonga na nzala te, kasi Nzambe akoleisa ye na Lipa ya Bomoi.

¹⁴ Sikoyo, liboso tótánga Buku na Ye ya búle, tógumba mitó mwa moke mpo na libondeli.

¹⁵ Nkolo, libondeli esilaki kopesama na esika oyo na mpokwa oyo. Ezalaki . . . banzembo ya Siona eyembami na bana na Yo. Mitema na bango esili kotómbwama. Mpe toyeyi awa mpo na komibúlisa epai na Yo, mpe kokumbamela Yo uta na bozindo ya elimo na biso. Mpe tozali kozongisa likambo oyo na makanisi na Yo, Nkolo, ete ntango Ofandaki likoló ya ngomba mpe olakisaki bayekoli na Yo, Olobaki: “Esengo na baoyo bazali na nzala mpe na mposa ya boyengebene, mpo bakotondisama.” Olakaki yango, Nkolo. Tozali koya na mpokwa oyo ná mitema mifungwámi. Tozali koya, na nzala mpe na mposa, mpe toyebi ete Okobatela elaka na Yo.

¹⁶ Wana tozali kosala makasi mpo na kofungola nkasa ya búlee ya Biblia, mpo na kotánga makambo kouta na kati na Yango, tika ete Molimo Mosanto ámema Yango na motema moko na moko. Mpe tika ete Momboto wana ékwea na bozindó, kondima ya bozui oyo ekokokisa elaka moko na moko oyo Liloba esálaki. Yoká biso, Nkolo, mpe pétola biso, mpe meká biso. Mpe soko ezali na eloko moko ya mbindo na ntina na biso, Nkolo, lisumu oyo eyambolami te, eloko nyonso oyo ezali malamú te, mónisa yango sikoyo, Nkolo, tokokende mbala moko mpe kobongisa yango, mpo tososoli ete tozali kobika na bilílingí ya Boyeyi na Nkolo Yesu. Mpe tosili kokóta, E Nzambe Mosanto, kati na elílingí ya boyengebene na Yo—na Yo, na mpokwa oyo, mpe tozali kobondela mpo na bomipesi, bobulisami, mpe kotondisama ya sika na Molimo Mosanto, na bomoi na biso.

¹⁷ Lokola móto ya kolamukisa ebandi kozimama, tika ete tóbakisa nkóni ya Liloba, ete Ékoka kopelisa móto ya sika, mpo mitema na biso étonda na mpiko. Búlisa biso, Nkolo, na nzela ya Liloba na Yo ya motuya mpe Makila na Yo, ná Ngolu na Yo, tobondeli bongo. Mpe matondi nyonso ná masanzoli ekozala na Yo. Longola makanisi mabe nyonso na mitema na biso. Petola

biso, E Nkolo. Pésa biso mitema peto, mpe maboko peto, ná makanisi peto, ete tókoka kokóta na esika na Yo ya búlee, mpokwa na mpokwa, na esengo, wana totondisami na Molimo na Yo. Tosengi yango na Nkombo na Yesu, mpe mpo na Ye. Amen.

¹⁸ Nalingi kotánga Liloba sikoyo. Mpe wana . . . nasengi na bino ete bóyáka na ba-Biblia na bino, bikomeli na bino, nkasa na bino, mpo na Makomi. Soko bolingi bongo, ekozala malamú mingi. Sikoyo, wana bozali koluka mokapo ya 7 ya Misala, mpo na kobanda; mpo na koyanola na motuna, to kobanda koyanola na motuna oyo: *Molimo Mosanto Ezali Nini?*

¹⁹ Ezali na eloko moko te oyo ekolóngá Satana, etikálá kozala na eloko moko te na mokili, oyo ekolóngá Satana, lokola Liloba na Nzambe. Yesu asálelaki Yango na etumba na Ye monene; Alobaki: “Ekomami . . .”

²⁰ Mpe na ntongo oyo, wana nazalaki koyoka, eleki mikolo mwa moke, bosangeli nsango moko elingaki koloba likambo moko ete bozalisi eutaki kaka na mputulú ya móto oyo mopepe esangisaki, ná mwa phosphate, mpe mwa chimie ya mabelé, mpe molungé ya kongenga na moi ekelaki momboto ya bomoi mpe ebotali bomoi. Oyo bolema mpenza! Nzokande, kongenga na mói ekoboma momboto nyonso ya bomoi. Tiá momboto libanda na kongenga na mói, ekoboma yango mbala moko. Mpe eloko ya bongo ezalaka te; kasi Satana azomeka kobeta ngai ná yango. Mpe nsima na ngai komema mwana na ngai Rebekah na kelasi na ntongo oyo, ntango nazalaki kozonga, nabandaki lisusu kofungola radio; kasi namilobelaki ete nakokutana lisusu na makambo wana, boye nakangaki yango.

Mpe wana nazalaki koya na balabala, Satana alobaki na ngai, alobaki: “Oyebi ete Moto oyo obengaka Yesu azalaki kaka moto lokola, mokolo moko na eleko na Ye, lokola Billy Graham to Oral Roberts? Azalaki kaka moto oyo mwa bato babandáki kosangana nzinganzinga na Ye mpe koloba ete Azali Moto monene, mpe nsima na mwa ntango Akómaki monene koleka, na nsima Akómaki nza—nzambe mpo na bango. Sikoyo epanzani na mokili mobimba, uta Akúfá, mpe esili na yango.”

²¹ Nakanisaki: “Ozali mpenza lokuta!” Na bongo, nabalukaki, kaka ntango nazalaki kokatisa balabala Graham. Nalobaki: “Satana, yo oyo ozoloba na lisosoli na ngai, nalingi kotuna yo mwa makambo: Nani yango nde basakoli ya Baebele balobaki ete akoya? Nani azalaki Masiya mopakolami? Eloko nini ezalaki likoló na bato oyo bamonaki Ye liboso mpe balobelaki bomoi na Ye, mibu nkóto na nkóto liboso Áya awa? Nani yango nde alobáki makambo liboso mpenza ndenge esengelaki kozala? Mpe, ntango Ayaki, balobaki: ‘Atángamaki elongo ná babúki mibeko,’ mpe Azalaki yango. ‘Azokisamaki mpo na masumu na biso,’ mpe Azalaki yango. ‘Nkunda na Ye etiamaki elongo na bazui, kasi Akosekwa, na mokolo ya misato,’ mpe Asalaki yango. Na nsima,

Alakaki Molimo Mosanto, mpe nazali na Yango. Na bongo, ekozala malamumu ete ózala mosika na Yango, mpo ekomami na Liloba, mpe Liloba moko na moko ezali solo.” Na bongo akendeki. Pesa ye kaka Liloba, yango ekoki. Akoki koyíkela Liloba wana mpiko te, mpamba te Epémelámá.

Tóbanda kotángá, na mpokwa oyo, na mokapo ya 7 na Buku ya Misala.

Bongo nganganzambe mokonzi alobaki, Makambo oyo majali bongo?

Mpe alobaki: Mibali, bandeko mpe tata, bóyoka; Nzambe ya nkembo amonanaki na tata na biso Abalayama, ntango azalaki na Mesopotamia, liboso ábanda kofanda na Halana,

Mpe alobaki na ye, Longwa na yo na mokili na yo, mpe na libota na yo, mpe kenda na mokili oyo nakotalisa yo.

Bongo abimaki na mokili ya Bakaladi, mpe afandaki na Halana: mpe kolongwa kuna, wana tata na ye akufaki, alongolaki ye wana, mpe akotisi ye na mokili oyo efandi bino na yango sasaipi.

Nde apesaki ye libula kati na yango te, te, ata eteni ekokani na litambe ya lokolo na ye te: nde alakaki ete akopesa yango na ye lokola mokili na bango, mpe na momboto na ye nsima na ye, atako wana azalaki naino na mwana te.

. . . Nzambe alobaki mpo na yango, Ete momboto na ye bakofanda na mokili mopaya; mpe bakokóma baombo na yango mpe bakonyokolama mibu nkama minei.

Mpe ekólo oyo bakotia bango baombo, Nakosambisa yango, Nzambe alobi bongo: mpe nsima na makambo yango, bakobima mpe bakosalela ngai na mboka oyo.

Apesaki ye kondimana na kokata ngenga: mpe bongo Abalayama abotaki Yisaka, mpe akataki ye ngenga na mokolo ya mwambe; mpe Yisaka abotaki Yakobo; mpe Yakobo abotaki bankoko zomi na mibale.

²² Na esika oyo, tolingi kobeleva na liteya yango, oyo nabanzi ete ezali likambo ya kafukafu lelo, ya . . . *Molimo Mosanto Ezali Nini?* Ezali Nini? Mpe, sikoyo, ntina oyo nazui liteya oyo kolandana na oyo boye, ezali ete, okoki koya kozua Molimo Mosanto te, soko oyebi te oyo Yango ezali. Mpe okoki kozua Yango te, ata oyebi oyo Yango ezali, longola se óndima ete Epesameli yo, mpe Ezali mpo na yo. Na bongo, okoki koyeba te soko ozali na Yango, to te, longola se óyeba mbano nini Yango ememaka. Boye, soko oyebi oyo Yango ezali, mpe Ezali mpo na nani, mpe mosala nini Ememaka ntango Eyaka, na bongo okoyeba eloko nini ozali na yango ntango okozua Yango. Bomoni? Yango nde ekokata likambo.

23 Ndakisa, nazalaki kosolola na Ndeko na biso Jeffries lelo, mpe alobaki: “Nakosepela kozala na losambo na mpokwa oyo, kasi nakozala kuna lobi na mpokwa.” Ayebaki te ete mayangani ezalaki kosalema, mpo topesaki liyebisi te mpo na yango; kaka awa. Bamosusu na . . . Ndeko Leo ná bango bakomelaki baninga na biso mosusu mpe bayebisaki bango, ya libanda na engumba oyo. Malamu, mpo tozalaki na esika te.

24 Sikoyo, nalobaki: “Ndeko Jeffries, soko otindi ngai nakende kofungola moko na mabulu na yo ya petrole, kasi nayebi na ngai eloko moko te na ntina na yango, ntango mosusu nakopanزا yango mpenza. Nakoki ntango mosusu kobalola fungola oyo esengeli te to kopelisa moteur esengeli te. Nakosengela koyeba lolenge ya kosala yango liboso násala yango.”

Ezali mpe bongu mpo na kozua Molimo Mosanto. Osengeli koyeba likambo oyo ozali koyela, mpe lolenge nini kozua Yango, mpe nini Yango ezali.

Sikoyo, likambo ya liboso, Molimo Mosanto elakamaki.

25 Tokoki kozua mpóso zomi mpe ata moke te . . . kozua kaka likoló-likoló ya mokonza oyo, oyo Molimo Mosanto ezali. Kasi, eloko ya liboso, nalingi kolobela kaka ndambo na makambo yango mpokwa na mpokwa, na nsima kotala na mpokwa ekolanda, soko mituna ezali.

26 Bato boni bazali awa, oyo bazui naino Molimo Mosanto te, oyo babatisami naino na Molimo Mosanto te? Bótombola maboko, boyebi soko bobatisami te. Bótala kaka maboko.

Sikoyo nalingi kolobela Yango, Molimo Mosanto lokola elembo, mpo Ezali elembo. Tososoli ete—ete bilaka nyonso epesamelaki biso na nzela na . . . Abraham azalaki tata ya elaka, mpo Nzambe apesaki elaka yango na Abraham mpe na Momboto na ye nsima na ye. Elaka epesamaki “na Abraham ná Momboto na ye”. Mpe elembo oyo ezali mpo na libota ya kondimana.

27 Sikoyo, bokeseni ezali monene katikati na Moklisto moko ná Moklisto oyo atondisami na Molimo Mosanto. Sikoyo, tokozua yango uta na Makomi, mpe tokotia yango mpenza na kati ya Makomi. Mpo na kobanda, ezali na Moklisto oyo alobaka azali Moklisto. Kasi soko Moklisto oyo atondisami naino na Molimo Mosanto te, azali kaka na nzela ya kokóma Moklisto. Bomoni? Alobaka ete andimi Yango; azosala makasi ya kozua Yango, kasi Nzambe apesi ye naino Molimo oyo te, Molimo Mosanto. Akómi naino na ntina yango te ná Nzambe, ete Nzambe ayebi yango.

28 Mpamba te, Nzambe asalaki kondimana ná Abraham, nsima na Ye kobenga Abraham, yango ezali elílingi ya kobéngama ya mondimi lelo.

Abengaki Abraham, mpe Abraham abimaki na ekólo na ye mpe akendeke na mboka mopaya, mpo na kofanda elongo na bapaya, mpe wana ezalaki elílingi ya ntango oyo Nzambe

abengaka moto ete átika mabe na ye, ábongola motema na lisumu na ye. Akopesa bongo mokongo na lisanga oyo azalaki kati na yango, mpo na kobika na lisanga ya sika, katikati na motindo ya sika ya bato.

Na bongo nsima na Nzambe komona ete Abraham azalaki sembo na elaka oyo Nzambe apesaki ye, ete akobota mwana, mpe na nzela na mwana yango, mokili mobimba ekopámbolama, bongo Nzambe andimisaki kondima na ye na nzela ya kopesa ye elembo, mpe elembo yango ezalaki kokatama ngenga. Mpe kokatama ngenga ezali elílingi ya Molimo Mosanto.

²⁹ Kaka na milongo oyo elandani mpenza, na mokapo oyo touti kotánga, soko bolingi kokoma yango. Mpe. . .Stefano alobaki, na molongo ya 51:

Bino bato ya mitó makasi. . .bazangá kokatama ngenga na mitema mpe na matoi, bino botelemelaka ntango nyonso Molimo Mosanto: lokola esalaki batata na bino, pelamoko bino bozali kosala.

³⁰ Kokatama ngenga ezali elílingi ya Molimo Mosanto. Mpe Nzambe apesaki na Abraham elembo ya ko—kokatama ngenga, nsima na ye kondima Nzambe na elaka na Ye mpe kokende na mboka mopaya. Bomoni? Ezalaki elembo.

Mpe bana na ye nyonso, mpe momboto na ye nsima na ye, basengelaki kozala na elembo oyo na nzoto na bango, mpo ezalaki bokeseni. Ezalaki kokabola bango ná mabota mosusu nyonso, elembo oyo ya kokatama ngenga.

³¹ Mpe yango nde Nzambe asalelaka lelo. Ezali elembo ya kokatama ngenga ya motema, Molimo Mosanto, nde esalaka ete Lingomba na Nzambe ézala Lingomba oyo ekabwani na bindimeli, biyamba mpe ba-denomination mosusu nyonso. Bazali kati na ba-denomination ya ndenge nyonso, kasi ata bongo, bazali libota oyo ekabwani. Bótika násolola na moto moko miníti mibale, nakoki koyebisa yo soko azuá Molimo Mosanto to te; yo mpe okoki. Ekabolaka bango. Ezali elembeteli. Ezali elembo. Mpe Molimo Mosanto ezali elembo. Mpe ezali. . .

Mwana nyonso oyo azalaki koboya kokatama ngenga na Kondimana na Kala, oyo ezalaki elilingi ya liboso ya Molimo Mosanto, azalaki kolongolama na kati ya bato. Akokaki kozala na bondeko elongo ná bato mosusu na eyanganelo te, soki aboyaki kokatama ngenga.

Sikoyo, bókokanisa yango na lelo. Moto oyo akoboya kozua libatizi ya Molimo Mosanto, akoki kozala na boyokani na bondeko te katikati na baoyo bazali na Molimo Mosanto. Okoki kosala yango te. Osengeli kozala na lolenge moko. Ndakisa, ezali. . .

³² Mama na ngai, kuna azaláká koloba: “Bandeke oyo bakokanaka basanganaka elongo.” Malamu, ezali lisese moko

ya kala, kasi ezali ya solo. Bomonaka bibenga ná bingondó koyokana na bondeko te. Bilei na bango ekeseni. Mimesano na bango ekeseni. Mposa na bango ekeseni.

Ezali mpe bongo mpo na mokili ná Moklisto, ntango *okátami ngenga* na Molimo Mosanto, elingi koloba “kolongola eteni ya nzoto”.

³³ Kokatama ngenga ekokaki kosalema kaka epai ya mobali. Kasi soko mwasi abalani ná mobali moko, akómi eteni ya mobali, akatamaki ngenga elongo ná ye. Bókanisa lisusu, na Timote, esika Elobi kuna: “Nde mwasi akobikisama na nzela ya kobota bana, soki akoumela na kondima mpe na bosantu elongo ná makanisi malamú.”

³⁴ Sikoyo, kokatama ngenga. Boyebi, ntango. . . Sará asekaki kati na hema nsima na ye, na nsango ya Mwanje, ntango Alobaki: “Abraham,” kozanga koyeba nani ye azalaki, mopaya, “wapi mwasi na yo, Sará?” Ndenge nini Ayebaki ete azalaki na mwasi?

³⁵ Lokola Yesu alobaki: “Lokola ezalaki na ntango na Lota, ekozala mpe bongo na boyei ya Mwana na moto.” Bómikanisela, bilembo yango esalemaki te na Sodomó mpe na Gomola, na mokili, katikati na basámbeli. Kasi ezalaki epai na Baponami, baye babéngami kobima. Mpe Abraham abengamaki kobima. Mpe liloba oyo *lingomba* elingi koloba “babengami kobima; baoyo bakabwani,” lokola Abraham amikabolaki mpe akatamaki ngenga.

Na bongo, ntango Sará asekaki nsango mpenza ya Mwanje, Nzambe akokaki koboma ye se na esika wana; kasi Akokaki kosimba Sará te kozanga kosimba Abraham, mpo bazalaki moko. Azalaki eteni ya ye mobali. “Bozali lisusu mibale te, kasi bokómi moko.”

³⁶ Boye, kokatama ngenga, Molimo Mosanto lelo ezali kokata ngenga ya motema. Mpe ezali elembo, elembo oyo epesami.

Moto moko alobaki mokolo mosusu. . . Nazósongela kaka oyo, lokola liseki te. Mpamba te, ezali solo, kasi eyokanaka lokola liseki. Lokola nalobaka yango mbala mingi, awa ezali esika ya kosala maseki te. Kasi ezalaki na mwa Allemand moko, kuna na Libongo ya Westi, esika oyo tozalaki. Azuaki Molimo Mosanto. Ntango azalaki kotambola na balabala, akotambola mwa moke, mpe akotombola maboko mpe alobi minoko ya sika. Mpe akopota mbangu, kopumbwa, mpe kogána. Mpe azalaki na mosala, kokobáká kosala ndenge wana mpe mokonzi na ye alobaki na ye: “Ozalaki wapi?” Ah-hah. Nalingaka bisika wana oyo okendeki. Alobaki: “Esengeli kozala ete okendeki kuna na nse katikati na etonga wana ya bato ndengé.”

Alobaki: “Na bongo, okanisi ete bazali bato ndengé?”

Alobaki: “Ya solo, bazali bongo.”

37 Alobaki: “Malamu, nkembo na Nkolo mpo na bato ndengé!” Mpe alobaki: “Oyebi nini? ba-ecrou esalaka mosala monene.” Alobaki: “Ndakisa, motuka, soko olongoli ba-ecrou na yango nyonso, ekotikala kaka ‘manzanza.’” Boye ezalaka kaka bongo.

38 Okomaka mpenza ndenge mosusu ntango Molimo Mosanto eyei likoló na yo, kino molimo ya mokili oyo ekolinga yo lisusu te, mpe bakotemela yo, mpe bakolinga kozala na eloko moko te ya kosala ná yo. Obotami na Mokili mosusu. Okomi mpenza kaka lokola mopaya, mopaya mbala zomi koleka oyo olingaki kozala, soko okokaki kokende mosika koleka na ba zamba ya Afrika. Okomaka ndenge mosusu ntango Molimo Mosanto eyei, mpe Ezali elembo. Ezali elembeteli kati na bato.

39 Sikoyo, okoloba: “Na bongo, Ndeko Branham, elembo yango ya kokatama ngenga epesamaki na Abraham?” Ezali ya solo. “Mpe na Momboto na ye?” Iyo.

40 Malamu, sikoyo tokozua Bagalatia, mokapo ya 3, molongo ya 29, mpo tómona ndenge nini yango ekoki kotiyama epai na biso. Bagalatia 3:29, kaka mpo na komona lolenge nini kokatama ngenga oyo ekoki kotiyama epai na moto ya Mabota, soko tozali bato ya Mabota; oyo, na nzela na mbotama ya bomoto tozali yango.

Sikoyo, yambo, nalingi kotánga molongo ya 16.

Nzokande elaka yango epesamaki na Abalayama mpe na momboto na ye. (Abraham ná momboto na ye!) Ye alobaki te: Mpe na mimboto na ye, . . .

Ata lolenge nini ya . . . koloba: “Oh, ngai mpe naza mimboto ya Abraham.” Te. Na “Momboto,” Momboto ya Abraham!

. . . Epai na mimboto te, lokola nde ejalaki mingi; kasi na moko: Mpe na—na bango . . . Mpe na momboto na yo, elingi koloba Klisto.

41 Klisto azalaki Momboto ya Abraham. Bondimi yango? Malamu, sikoyo tózua molongo ya 28 mpe ya 29.

Moyuda ajali te, Moela mpe te, ezali mpe na moombo to nsomi te, ezali mpe na mobali to mwasi te: mpo biso nyonso tojali moko kati na Klisto Yesu.

Mpe soko bojali ya Klisto, bongo bozali momboto ya Abalayama, mpe bozali basangoli ya libula kokokana na elaka.

Tokómaka “Momboto ya Abraham ndenge nini”? Na kozaláká kati na Klisto, na bongo tozali Momboto ya Abraham. Mpe Momboto na Abraham ezalaki nini? Lokola, tokoki kokóba na Baloma 4 mpe bisika ndenge na ndenge.

Abraham atikálá kozua elaka te ntango akatamaki ngenga. Mpo na kotalisa ete kokatama ngenga ezalaki kaka elíngi, azuaki elaka liboso ákatama ngenga. Mpe yango ezalaki elíngi,

ya koyeba mpenza kondima na ye, oyo azalaki na yango liboso ákatama ngenga.

⁴² Sikoyo, ntango tozali kati na Klisto, tokómi Momboto ya Abraham, mpe tozali basangoli ya libula elongo ná Klisto, na yango, etali te banani biso tozali, Moyuda to moto ya Mabota.

Mpe, “Momboto ya Abraham,” Momboto ya Abraham azalaka na kondima ya Abraham, oyo azuaka Nzambe na Liloba na Ye. Ata soko Emonani lokola bozoba ndenge nini, ata osali makambo libanda ya momesano ndenge nini, ata soko Ékomisi yo ndenge nini, zua Nzambe na Liloba na Ye kotalela ata eloko moko te.

⁴³ Abraham, na mibu ntuku nsambo na mitano, mpe Sará, na mibu ntuku motoba na mitano, azuaki Nzambe na Liloba na Ye, mpe abengaki nyonso oyo ekeseneki na Yango lokola ete ezalaki te. Bokanisi makambo nini minganga ya eleko wana bakanisaki? Bokanisi ete bato bakanisaki nini, ntango bamonaki mobange mobali moko, ya mibu ntuku nsambo na mitano, kokendéké bipai na bipai kosanzoláká Nzambe, ete ye “akobota mwana” na nzela ya mwasi na ye, oyo azalaki na mibu ntuku motoba na mitano, mpe asilaki kolekisa mabongi ya bomwasi na mibu pene na ntuku mibale na mitano? Kasi, bomoni, esalaka ete ósala makambo ya ndenge, kondima ya Abraham.

⁴⁴ Mpe ntango okatami ngenga na Molimo Mosanto, Ekosala yo ndenge moko. Ekosalisa yo makambo oyo okanisaki te ete okosala. Ekosala ete ózua elaka ya Nzambe mpe óndima Nzambe.

⁴⁵ Sikoyo, Ezali mpe, libanda na kozala e—elaka mpe elembeteli, Ezali mpe elembo. Sikoyo, soko bokolinga kozua elongo ná ngai Baroma. Liboso, nalingi ete bózua, elongo na ngai, Baefese 4:30, mpe tótánga yango mwa moke. Baefese 4:30 elobi boye.

Sikoyo, boyóká bato mingi koloba ete makambo ndenge na ndenge ezali bilembo. “Soko okoti na lingomba, ozali na elembo ya lingomba.” Mpe bato mosusu balobaka: “Ezali kotósa mokolo moko boye, mokolo ya sabata, yango nde—yango nde elembo ya Nzambe.” Bamosusu na bango balobaka: “Soko tokómi bandimi ya denomination moko boye, totiami elembo na kati ya Bokonzi ya Nzambe.”

⁴⁶ Sikoyo, Biblia elobi: “Tika ete liloba nyonso ya moto ézala lokuta, mpe ya Nzambe ézala Solo.” Sikoyo, Baefese 4:30 elobi boye:

Bóyokisa Molimo Mosanto na Nzambe mawa te, oyo na nzela na yango botiami elembo kino na mokolo na lisiko.

⁴⁷ Nakosengela kobeta sete mwa makasi likoló na likambo oyo sikoyo, mpo na kofandisa yango. Sikoyo, bino bandeko ya

mibeko, bófanda kimia mwa moke. Bomoni? Bomoni ntango boni elembo yango eumelaka? Kino kolamukisa ya nsima te, kino mbala ya nsima oyo mbéba ékozala. “Kino na mokolo ya lisiko na bino,” oyo wana nde bolai ya ntango oyo botiami elembo. “Kino na mokolo ya lisiko na bino,” ntango bokosikolama kino kozala elongo ná Nzambe, oyo wana nde bolai ya ntango oyo Molimo Mosanto atiaka bino elembo. Longwa na kolamukisa kino kolamukisa te; kasi longwa Seko kino Seko, botiami elembo na Molimo Mosanto.

Wana nde oyo Molimo Mosanto ezali, Ezali elembo ya Nzambe, ete Asili kozua . . . ete ozui ngolu na miso na Ye, mpe Alingi yo, mpe Andimi yo, mpe Atii elembo na Ye likoló na yo. Elembo ezali nini? Moto moko . . . Ee, *elembo* etalisaka to elingi koloba “mosala oyo esili.” Amen. Nzambe abikisi yo, abulisi yo, apetoli yo, azui ngolu ná yo, mpe atii yo elembo. Asilisi. Okómi oyo ya Ye kino mokolo ya lisiko na yo. Eloko oyo *etiami elembo* ezali “eloko esili”.

Molimo Mosanto ezali nini? Ezali elembeteli. Tokokóma na oyo wana mwa moke na nsima, na Liteya mosusu, elembeteli oyo Paulo alobelaki. Minoko ya sika ezaláki elembo epai na bandimi, to, bazangi kondima.

⁴⁸ Sikoyo bótala, kasi, na likambo oyo, Molimo Mosanto ezali elembeteli. Nalingi koloba . . . Mpe Molimo Mosanto ezali elembo. Ezali elembo oyo Nzambe apésáki na bana na Ye aponáki. Koboya Yango, ezali kolongolama na kati na bato; mpe kozua Yango, ezali kosilana na mokili mpe makambo nyonso ya mokili, mpe kokóma eloko oyo Nzambe asili kotiela elembo ya kondimama.

⁴⁹ Nazaláká kosala na kompani ya nzela ya bingbunduka awa na Harry Waterberry, mpe tozalaká kokende kotondisa likalo. Ndeko na ngai ya mobali, Doc, oyo ateleme kuna na nsima, asungaka kotondisa makalo. Ntango likalo ezali kotondisama, batáláka-talaka na kati ya likalo, motáli-tali, mpe soko akúti eloko moko oyo efandi malamau te, oyo ekoki kokwea mpe kobukana, to eloko nyonso oyo ekoki kobeba; akotia elembo na likalo yango te, kino likalo yango étondisama mpenza na mobimba, kino ékangama mpenza malamau mpe étiana mpenza na molongo, na lolenge ete koningana ya mobembo ébebisa eloko moko te oyo ezali na kati na yango.

⁵⁰ Yango nde ntina oyo totiamaka elembo mingi mpenza te; tozali na zololo mingi mpenza na makambo. Ntango Motáli-tali alekaka, mpo na kotala-tala na bomoi na yo, komona soko ozalaka na mwa zololo te na makambo, mwa zololo na bomoi na yo ya mabondeli, mwa zololo na nkanda wana, mwa petepete ná lolémo wana, mpo na kotóngaka bato mosusu, Akotia elembo na likalo wana ata moke te. Mwa bizaleli ya bosoto, mwa makambo

ya mabe, mwa makanisi ya mbindo, Akoki kotia elembo na likalo te.

Kasi soko Amoni ete eloko nyonso ezali na esika na yango, Motáli-tali, na ntango wana Akotia yango elembo. Ata moto moko te ámeke kofungola elembo wana kino likalo yango ékóma na nsuka na esika oyo elembo etiamaki mpo na yango! Yango mpenza. “Bósimba bapakolami na Ngai te; bósala mabe moko te na basakoli na Ngai. Mpamba te nalobi na bino, ekozala malamú koleka mpo na yo ete libanga monene ékangama na nkingo na yo, mpe ózindisama na bozindó ya mbu, na esika ya komeka ata kobetisa libaku to koningisa oyo ya moke koleka na baoyo basili kotiamá elembo.” Bomoni eloko nini elingi koloba?

⁵¹ Yango nde Molimo Mosanto ezali. Ezali endimiseli na yo. Ezali kobatelama na yo. Ezali motatoli na yo. Ezali elembo na yo. Ezali elembeteli na yo, ete: “Nakangami kokende na Lola. Etali ngai te oyo zabolo akoloba! Nakangami kokende na Lola. Mpo na nini? Atielaki ngai elembo. Apesaki ngai Yango. Atii ngai elembo na kati ya Bokonzi na Ye, mpe nazokende na Nkembo! Mipepe mípepa, Satana ásala oyo alingi. Nzambe asili kotia ngai elembo kino na mokolo ya lisiko na ngai.” Amen! Oyo wana nde Molimo Mosanto ezali. Oh, bosengelaki kozala na mposa na Yango. Nakoki kokóba te kozanga Yango. Makambo mingi mpenza ekokaki kolobama wana, kasi nandimisami ete boyebi eloko nini nazoloba.

⁵² Sikoyo, tózua lisusu, tokende na Yoane 14, mwa moke kaka. Nalingaka Liloba mpenza! Ezali Solo.

⁵³ Sikoyo, Molimo ya Nzambe, Molimo Mosanto, Molimo Mosanto ezali nini? Ezali Molimo ya Klisto kati na yo. Sikoyo, liboso tótánga, nalingi kobakisa mwa maloba moke awa. Molimo Mosanto ezali nini? Ezali elembo. Molimo Mosanto ezali nini? Ezali kondimana. Molimo Mosanto ezali nini? Ezali elembeteli. Boye Molimo Mosanto ezali nini? Ezali . . . Molimo ya Yesu Klisto kati na yo. Bomoni? “Nsima na mwa ntango,” Yesu alobaki, “bamokili bakomona Ngai lisusu te; kasi bino bokomona Ngai, mpo nakozala elongo na bino, ata kati na bino, kino na nsuka ya mokili.” Molimo ya Nzambe na kati ya Lingomba na Ye!

⁵⁴ Mpo na nini? Mpo na nini Asalaki yango? Oyo ezali mwa moke na ntina na liteya ya lobi na mpokwa. Kasi Asalaki yango mpo na nini? Mpo na nini Ye, mpo na nini Molimo Mosanto. . . Mpo na nini, mpo na nini Ayaki? Mpo na nini Ayaki kati na yo, mpo na nini Ayaki kati na ngai? Ezalaki mpo na kokóba kosala misala ya Nzambe.

⁵⁵ “Nasalaka ntango nyonso oyo esepelisaka Tata na Ngai. Naye te mpo na kosala mokano na Ngai Moko, kasi Tata oyo atindi Ngai. Mpe Tata oyo atindi Ngai azali elongo na Ngai; mpe lokola Tata na Ngai atindaki Ngai, Ngai mpe Natindi bino.” Oh,

la la! Tata oyo atindaki Ye, akendeki kati na Ye. Tata oyo atindaki Yesu ayaki kati na Ye, asalaki na nzela na Ye.

Yesu oyo atindi yo, akendaka elongo ná yo mpe azali kati na yo. Mpe soko Molimo wana, oyo ezalaki kobika kati na Yesu Klisto, esáláki ete Ye ásala mpe ábika lolenge Asalaki, okozala na mwa likanisi ya lolenge oyo Ekosala ntango Ekozala kati na yo, mpo Bomoi wana ekoki kobongwana te. Ekokende longwa na nzoto moko kino nzoto mosusu, kasi Ekoki kobongola lolenge na Yango te, mpo Ezali Nzambe.

⁵⁶ Sikoyo na Yoane 14, tótánga mwa moke, kobanda na molongo ya 10.

Ondimi . . . ete Najali kati na Tata, mpe Tata ajali kati na ngai? Misala . . . maloba oyo najali koloba na bino, nazali koloba yango na ngai moko te: kasi Tata oyo afandi kati na ngai nde akosalaka misala.

Bókanisa yango. Sikoyo:

Bóndima ngai ete najali kati na Tata, mpe Tata kati na ngai: soko bongo te, bóndima ngai mpo na misala.

Solo, solo, nalobi na bino, Ye oyo akondimaka ngai, misala mijali ngai kosala, akosala yango . . . mpe lokola; mpe akosala ya minene koleka oyo; mpo ete nakokenda epai na Tata na ngai.

Bozómona te? Bomoni lolenge Alobaki kuna? Sikoyo, bótaalá oyo malamau, lolenge ekosuka. Nakotánga mwa moke lisusu. Tokotánga kino pene na molongo ya 20. “Mpe nyonso oyo bokosenga na . . .” Tótala, Nazalaki na . . . Iyo. Ah-hah. Malamau.

Mpe nyonso oyo bokosenga na nkombo na ngai, ngai nakosala yango, mpo Tata ázua nkembo kati na Mwana.

Soko bokosenga likambo nini na nkombo na ngai, ngai nakosala yango.

Soko bolingi ngai, bótósa mitindo na ngai.

Mpe nakobondela Tata, (sikoyo bólanda malamau) mpe akopesa bino Mobondisi mosusu, mpo ájala elongo na bino mpo na libela;

Molimo na solo; oyo bamokili bakoki koyamba te, jambi bajali komona ye te, mpe bajali koyeba ye te: kasi bino boyebi ye; mpo afandi elongo na bino, mpe akojala kati na bino.

⁵⁷ Boye Molimo yango azali Nani? Molimo Mosanto ezali nini? Ezali Klisto kati na yo. Mobondisi, oyo wana nde Molimo Mosanto. “Mpe ntango Mobóndisi akoya, Akosala makambo yango moko oyo Nasalaki ntango Mobondisi azali kati na Ngai. Nakobondela Tata, mpe Akopesa bino Mobondisi oyo. Bino boyebi Mobóndisi yango. Bamokili bayebi Ye te, bakotikaláká koyeba Ye te. Kasi bino boyebi Ye, mpo Afandi elongo na bino

sikoyo,” Yesu azali koloba, “kasi Akozala kati na bino.” Yango wana mpenza, oyo wana nde Mobóndisi, “akozala kati na bino”.

Nakotika bino bitike te, nakoya epai na bino.

“Nako. . .” Sikoyo, oyo wana nde Mobondisi: Klisto. Wana nde oyo Molimo Mosanto ezali, ezali Klisto.

Nsima na ntango moke, bamokili bakomona ngai lisusu te; nde bino bokomona ngai, mpo najali na bomoi, bino . . . mpe bozali na bomoi.

⁵⁸ Oh, tokoki kokoba se kokoba; kasi, tika ete bóyeba. Azali nini? Azali elembo. Azali elembeteli. Azali Mobóndisi. Bomoni nyonso oyo Azali? Momboto ya Abraham esangoli Yango.

⁵⁹ Sikoyo, tokomona lisusu ete mo. . . eloko nini mosusu Mobondisi azali. Tókende na Yoane ya Liboso 16:7, mpo tómona soko Azali mpe Molobeli te. Boyebi oyo molobeli azalaka, azali moto oyo alobelaka bato. Tozali na Molobeli moko. Toyebi yango. Yoane ya Liboso mokapo ya 16. . . Oh, bózela naino, bólimbisa ngai. Santu Yoane, ezali, 16:7. Bólimbisa ngai. Bólimbisa mpenza ete nalobaki bongo. Natángaki yango malamumu te na . . . nazuaki 16:7.

Nzokande, nazali koloba solo na bino ete; Ezali malamumu mingi mpo na bino ete nákende, mpamba te soko nakei te, Mobondisi akoya epai na bino te; kasi, soko nakei, nakotindela bino ye.

Mpe ntango akoya, akondimisa mokili na ntina na lisumu, na ntina na boyengebene, mpe na ntina na kosambisama:

Na ntina na lisumu, mpo bandimeli ngai te;

Na ntina na boyengebene, mpo nazali kokende epai na Tata, mpe bino bokomona ngai lisusu te;

Na ntina na kosambisama, jambi mokonzi ya mokili oyo asambisami.

⁶⁰ Oh! Sikoyo, Molobeli, ezuami na—na Yoane ya Liboso 2:12. Sikoyo, tótanga yango, mwa moke, Yoane ya Liboso 2:12. Bólimbisi, Yoane ya Liboso. . . ezali nde 1 mpe 2. Nakomaki yango, Yoane ya Liboso 2:1 kino 2.

Bana na ngai, nazali kokomela bino makambo oyo, ete bósala lisumu te. Nde soko moto nani akosala lisumu, tojali na molobeli epai na Tata, Yesu Klisto moyengebene:

Nani azali Molobeli? Yesu Klisto moyengebene.

Ye ajali—ajali mbodi mpo na masumu na biso, mpe bobele mpo na yango na biso te, kasi mpo na masumu ya mokili mobimba.

⁶¹ Molimo Mosanto ezali nini? Ezali Molobeli. Eloko nini. . . Molobeli azali eloko nini? Nini nde Yango esalaka? Elobelaka.

Eyokelaka mawa. Yango, Ezuaka esika na yo. Yango, Esalaka makambo oyo yo okoki kosala te. Yango, Ezali—Ezali mbondi mpo na masumu na yo. Ezali boyengebene na yo. Ezali lobiko ya nzoto na yo. Ezali Bomoi na yo. Ezali lisekwa na yo. Ezali nyonso oyo Nzambe azali na yango mpo na yo. Azali Molobeli.

⁶² Tokokaki mpenza kokota na bozindo na yango mpo na kolobela yango, na lolenge nini ntango E—Ebondelaka mpo na kozanga koyeba na biso. Mbala mosusu ntango . . . tozali na Molimo Mosanto, na bozangi boyebi tobétaka mabaku mpe tomikotisaka na likambo moko. Molimo Mosanto azali wana mpo na kolobela biso. Azali Molobeli na biso. Atelemaka na biso . . . Azali Molobeli na biso. Atelemaka wana mpe Asám-baka mpo na biso. Tosám-baka mpo na biso moko te, mpo Molimo Mosanto kati na biso asám-baka mpo na biso. Molimo Mosanto nde apésaka biso maloba ya koloba, mbala mosusu ná maloba oyo bokokaka kososola te, mpe Abondelaka mpo na biso. Oyo wana nde Molimo Mosanto ezali.

⁶³ Ntango namikotisaka na likambo moko boye, na—natambolaka lokola mwana moke; otambolaka lokola elengé. Bisó, tozali kotambola kati na mokili ya molili etondi na banguna, etondi na masumu, etondi na mitámbo, etondi na biloko nyonso.

Okoloba: “Oh, nabángaka. Nabángaka kobika bomoi ya Moklisto. Na, nabangaka kosala *oyo*. Nabangaka ete nákosala likambo *oyo*.”

Kóbangaka te. Tozali na Molobeli. Amen. Oh, Azuaka ngambo na biso. Azali kati na biso, mpe Abondelaka mpo na biso. Molimo Mosanto, ntango nyonso, ntango nyonso, alobelaka biso, ntango nyonso. Azali Molobeli na biso. Oh, tózongisi mpenza matondi na Nzambe mpo na yango!

⁶⁴ Elembo, elembeteli, Molimo ya Bomoi, Nzambe ya Likoló, Mobóndisi, Bomoi, Molobeli. Azali eloko nini? Oh, la la! Tokoki kokoba se kokoba ba-ngonga ebele ná yango.

⁶⁵ Sikoyo, tokolobela likambo mosusu, mwa moke. Sikoyo, tokosenga sikoyo . . .

Elakamaki mpo na biso na mikolo ya nsuka! Molobeli oyo, elembo, elaka, nyonso oyo tosili koloba mpo na Ye na mpokwa oyo, mbala nkóto zomi koleka, Elakamaki mpo na biso na ntango ya nsuka.

Na eleko wana, bazalaki na Yango te. Bazalaki kaka na elembo na nzoto na bango, lokola ndangá mpe lokola elembeteli, kondimáká ete Ezalaki koya, mpe bazalaki kotambola na elilingi ya mobeko. Na bongo, bazalaki kokatama ngenga na nzoto.

⁶⁶ Lelo tozali kotambola na elilingi ya mobeko te. Tozali kotambola na nguya ya lisekwa. Tozali kotambola na nguya ya Molimo, Oyo ezali elembo na biso ya solo, Molobeli na biso

ya solo, Mobóndisi na biso ya solo, elembeteli na biso ya solo ete tosili kobotama uta na Likoló; bato ndengé, bato bakeseni, kosaláká makambo ndengé, kozuáká Nzambe na Liloba na Ye, kobengáká makambo mosusu nyonso lokuta. Liloba na Nzambe ezali solo. Yango nde... Oh, la la! Yango nde oyo Molimo Mosanto ezali.

⁶⁷ Bozali na mposa na Yango? Bokolinga kozala na Yango te? Tótala soki Elakamaki.

Sikoyo tózonga na Yisaya, Buku ya Yisaya. Tózua mokapo ya 28 ya Yisaya. Sikoyo tokei na Yisaya 28, mpe tokobanda pene na... Tózua molongo ya 8, mpo tómona ndenge Yisaya alobaki, mibu nkama nsambo na zomi na mibale, liboso ete Ésalema.

⁶⁸ Tokokaki koloba ebele na ntina na oyo, kozonga nsima, nsima mpenza, kasi tokobanda kaka awa mpo na komona soko Elakamaki na Lingomba. Esengelaki koya na mokolo nini? Na mikolo ya nsuka, na ntango oyo li—libebi ekozala. Sikoyo, bómikanisela, liloba yango ezali na boyíké, “mikolo,” mikolo mibale ya nsuka, mibu nkóto mibale ya nsuka.

Sikoyo, sikoyo na molongo ya 8.

Nyonso, *mesa nyonso etondi na... mbindo, ete esika ya peto ezali te.*

⁶⁹ Lelo, bóluka-luka bipai nyonso mpo na komona yango. Bótala bipai nyonso mpe bomóna soko tozali na mokolo yango. “Mésa nyonso!” Ee, bakendeke na Elambo ya Nkolo, mpo na kobanda, na oyo etali biloko, baliaka eteni ya lipa ya kala to ya biscuit, mpe babukaka yango mike-mike mpo na kosala elambo. Nzokande, esengeli kosalama na maboko ya moto oyo azali na Molimo Mosanto, lipa oyo ezangi mfúlu. Klisto azali bosoto mpe mbindo te, mpe yango etalisaka Ye.

⁷⁰ Likambo mosusu, bapesaka yango na bato oyo bamelaka, bakósaka, bayíbaka, babéndaka makaya, batiáka tumbáku, (fiou!) ata eloko nini, bázala bobele bato ya lingomba. Mosika na yango! Soko moto alei yango, ntango toliaka yango awa, azali komipemela mpe komimelela esambiseli, wana azangi kosósola Nzoto ya Nkolo. Soko abikaka bomoi yango te, ázala mosika na yango.

Mpe soko olei yango te, etalisi ete lisosoli na yo moko ezali kokweisa yo. “Moto oyo akolia te, azali na eteni moko te ná Ngai,” elobaki Yesu.

⁷¹ Kasi mesa nyonso ya Nkolo esili kotonda na bosoto. Esika moko ya mpeto ezali te. Bóyoka, soko wana ezali elili ya lelo te!

Epai na nani ako... nani ye akolakisa boyebi? mpe akolimbola... lisosoli ya malakisi epai na nani?...

... nani akososola boyebi?... nani ye akoki kososolisa malakisi?...

“Ee, Nzambe ápambolama, naza Presibiterien. Naza Metodiste. Naza Pantekotiste. Naza Nazareen. Naza Pelerin de la Sainteté.” Yango elakisi eloko moko te epai na Nzambe; ezali kaka mésa mosusu.

. . . nakolimbola *malakisi* epai ya nani? . . .

⁷² Malakisi ya lolenge nini; ya Metodiste, Batiste, Presibiterien, Pantekotiste? Malakisi ya Biblia!

. . . nakoyebisa *malakisi* epai ya nani? . . .

⁷³ Okoyeba ndenge nini ntango ozali na Yango? Tokokóta na yango mokolo ya Mitano na mpokwa. Bomoni?

. . . nakoyebisa *malakisi* epai ya nani? (sikoyo bótala)
epai na baoyo batikisami miliki, mpe balongolami na mabéle.

⁷⁴ Bana mike balobaka: “Ee, nakendeke na losambo, mama na ngai azalaki kosámbela na lingomba oyo.” Naboi yango ata moke te, ndeko na ngai. Mpe nayebi malamú ete likambo oyo ezali kotiana na bande. Eza mabe te, zalá na yo na lingomba ya mama. Kasi, yoka, mama atambolaki na kati ya polé moko, yo ozali kotambola na mosusu.

⁷⁵ Luther atámbolaki na kati ya polé moko; Wesley atámbolaki na mosusu. Wesley atámbolaki na polé moko; Pantekote etámbolaki na mosusu. Kasi tozotámbola na oyo ezali likoló koleka wana lelo. Mpe soko ekeke mosusu ekoya, ekokende mosika koleka biso.

⁷⁶ Kalakala, na mikolo ya ebandeli, ntango ezalaki monene, monene mpenza, Luther ateyaki kolongisama na nzela na kondima. Ezalaki kaka mpo na komema bato longwa na Bokatoliko kino na bo-Protestant, na kati ya bondeko zingazinga na Liloba. Kolongisama na nzela na kondima, oyo wana ezalaki etando monene mingi. Batikálá kolongwa na yango te.

⁷⁷ Na nsima kolamukisa mosusu eyaki, babengi John Wesley. Eningisaki bango mpe elongolaki bango wana, mpe ememaki bango na kobulisama, kobika bomoi ya malamú, ya mpeto, ya búlee, ebulisami na Liloba ya Nzambe, epesaka esengo na motema na yo. Yango elongolaki ebele na malakisi ya Luther.

⁷⁸ Bongo Pantekote eyaki ná libatisi ya Molimo Mosanto, mpe ekómisaki yango lisusu moke makasi, na koyambáká Molimo Mosanto. Ya solo.

Sikoyo, ebandi mpe koningana mpe kokita. Makabo, ná bozongisami, ná Molimo ya Nzambe eyei, na litondi ya bilembo mpe bikámwa, ekoti na kati ya Lingomba, mpe eningisi Pantekote. Ezali nini? Tokómi mpenza mpembeni na Boyei ya Nkolo Yesu, na lolenge ete Molimo mpenza, oyo ezalaki kati na Ye, ezali kosala mosala na kati ya Lingomba, kosaláká makambo ndenge moko na oyo Asalaki, ntango Azalaki awa na mokili.

Etikalá kosalema te, kobanda na ntango ya bantóma kino na ntango oyo.

Mpo na nini? Bomoni, ezali monene; ekómi moke, moke, moke. Ezali nini? Ezali lokola loboko na yo oyo ezali kobeleva na elilingi na yango; elilingi, elilingi, elilingi. Kasi ezali nini? Ezali etaliseli. Luther azalaki nini? Etaliseli ya Klisto. Wesley, azalaki nini? Etaliseli ya Klisto.

⁷⁹ Bótala, Eleko ya Billy Sunday euti kosila. Mokolo mosusu, mobange Dr. Whitney, oyo ateyaki awa na eteyelo oyo, moto ya nsuka na eteyelo ya kala, akufi, na mibu pene na ntuku libwa, nabanzi. Billy Sunday azalaki molamukisi epai ya mangomba ya nkombo na eleko na ye. Asalaki maseki na moto te; akoteleva wana mpe kogánga: “Bino nyonso ba-Methodiste, bobéleva awa liboso na nzela ya mputulú ya mabayá, batei mpe bino nyonso! Bino nyonso ba-Batiste, bobéleva awa liboso na nzela ya mputulú ya mabaya wana! Bino ba-Presibiterien!” Asalaki maseki te. Azalaki Billy Graham ya mokolo oyo.

⁸⁰ Bótala. Na nsima, kaka na ntango yango moko oyo lingomba ya nkombo ezalaki kozua kolamukisa na yango, likambo nini esalemaki? Nsango-malamu mobimba ezalaki kozua kolamukisa. Bandeko Bosworth bayaki, Smith Wigglesworth, mpe Dr. Price, Aimee McPherson, baoyo nyonso wana.

Bótala, Smith Wigglesworth akufaki butu moko. Docteur Price akufaki na ntongo elandaki. O ntei ya ngonga ntuku mibale na minei, nazalaki na elanga ya mosala.

⁸¹ Sikoyo nsuka na ngai ezali koya. Bótala . . . Bozoyoka mingi te na ntina na Billy Graham. Bozoyoka mingi te na ntina na Oral Roberts. Namoni ete mayangani na ngai ebandi kokita. Likambo yango nini? Tokómi na nsuka, eleko mosusu.

⁸² Billy Sunday ayaki lolenge nini, ná bamosusu wana? Bayaki kaka nsima na kolamukisa monene ya Moody. Moody ayaki ntango nini? Kaka nsima na kolamukisa ya Knox. Knox ayaki ntango nini? Kaka nsima na kolamukisa ya Finney. Finney nsima na Calvin, Calvin nsima na . . . Na bongo, Wesley, mpe Wesley nsima na Luther. Bongo na bongo, na kati ya bileko. Kaka ntango kolamukisa moko esili, Nzambe atelemisaka mosusu mpe apesaka Polé koleka; kokóba kaka kokende lolenge wana.

⁸³ Sikoyo tokómi na nsuka ya eleko oyo. Moto nyonso azalaki kotala nsuka ya nzela na ye mpo na Boyei ya Klisto, kasi bazalaki na makambo mingi ya kotalela liboso; bozongi ya Bayuda, basoucouples volantes na likoló, makambo nyonso oyo tozomona lelo. Kasi tokómi na nsuka. Tokomi awa sikoyo. Bayebaki ete Lingomba esengelaki koyamba Nguya oyo ekosala, na kati ya Lingomba misala ya ndenge moko na oyo ya Klisto, mpo lokola elilingi ekómaka bozindó koleka, mpe koleka, mpe etalisaka mingi koleka.

84 Bozua elílingí. Koleka mosika mpenza na elílingí, okomona kotalisama ya elílingí malamú te. Nsima na mwa ntango, elilingi ekómaka pene koleka mpe koleka, kino nzete ná elilingi ekomaka eloko moko.

85 Sikoyo, Molimo na Nzambe esalaki mosala na nsé ya kolongisama, na nsé ya Luther; kobulisama, na nsé ya Wesley; libatisi ya Molimo Mosanto, na ntango ya Pantekote; mpe Yango oyo awa na mokolo ya nsuka, kokokisáká mpe kosaláká makambo yango moko mpenza oyo Esalaki ntango Ezalaki na kati ya Klisto. Ezali nini? Lingomba ná Klisto bakómi Moko.

Mpe kaka ntango Bakosangana, na ekanganeli ya nsuka, Akomata na likoló, kogángáká na esengo. Wesley, Luther, bakolamuka, ná bamosusu nyonso oyo bazalaki na mikolo wana, “ye oyo aza ya liboso akozala ya nsuka, ye oyo aza ya nsuka akozala ya liboso,” mpe lisekwa ekosalema.

86 Tozali na ntango ya nsuka. Bóyoka, yango nde oyo Molimo Mosanto esalaka. Molimo Mosanto, na nzela ya kolóngisama, bomoni, kaka elílingí na Yango ya moke; Molimo Mosanto, na nzela ya kobulisama, mwa elílingí na Yango ya koleka; Molimo Mosanto, na nzela na libatisi na Yango, elílingí ya makasi koleka; sikoyo Molimo Mosanto, na nzela ya bozongisami ya Bomoto na Ye moko mpenza oyo ezali awa, kosaláká bilembo mpe bikamwa, lokola Asalaki na ebandeli. Fiou! Nkembo! Bokobenga ngai “motúntuki” ata bongo, ekozala malamú ete bóbanda nde sikoyo.

87 Bóyoka, bandeko, bóyoka likambo oyo.

. . . mésa nyonso etondi na kosánja . . . esika ya mpeto ezali te.

Akoteya boyebi epai na nani? . . . akoyebisa lisosoli ya malakisi epai na nani? epai na baoyo batikisami miliki, oyo bauti kolongolama na mabéle.

Ba-bebe mike te; babebe Presibiterien, babebe Methodiste, babebe Pantekotiste, babebe Lutherien, babebe Nazareen. Azali na mposa ya moto moko oyo alingi kozala mosika na mabéle mpe kolia bilei ya makasi. Yango oyo:

Jambi ejali lilako likoló na lilako, . . . likoló na lilako; molongo likoló na molongo, . . . likoló na molongo; moke awa, mpe moke kuna:

Mpo na nzela na bibebu ya likukuma mpe minoko mosusu nde Ngai nakoloba na bato oyo.

Na baoyo alobaki na bango ete: Oyo ejali kopema kati na yango nde bokoki kopémisa moto oyo alembi; mpe esika ya kimia yango oyo: kasi balingaki koyoka te.

88 Molimo Mosanto, Eyaki mpenza ndenge wana na Mokolo ya Pantekote, esakolamaki mibu nkama nsambo na zomi na mibale

liboso Éya! Yango oyo na Mokolo ya Pentekote, eyaki mpenza ndenge wana.

⁸⁹ Moto moko alobaki: “Ezali likambo ya kotósa mokolo ya sabata.” Naboi te to natioli lingomba to losambo ya moto moko te. Kasi alobaki: “Mokolo ya sabata, sabata ya Nzambe ezalaki mokolo ya kopema.”

Mokolo ya kopema yango oyo. “Oyo nde kopema,” Alobaki, “bópemisa moto oyo alembi.” Yango nde. Amen! “Ekozala lilako likoló na lilako, molongo likoló na molongo.” Kopema nde yango oyo. Molimo Mosanto ezali nini? Kopema. Oh!

Bóya epai na ngai, bino nyonso oyo bolembi mpe bozali na mikumba, mpe nakopesa bino kopema.

⁹⁰ Ye azali Nini? Ye oyo ayei kati na yo, apesi yo kimia; elembeteli na yo, Mobondisi na yo; obondisami, na kopema, otiami elembo.

⁹¹ Lolenge nini ozali...? Ezali elembeteli; mokili eyebi ete likambo moko esili kokómela yo. Ezali Nini? Ezali Mobondisi. Ezali Nini? Elembo. Ozali kopema. Ozali na... Ezali Molobeli na yo. Soko yo, soko likambo moko ekómeli yo, ezali na Eloko moko kuna mpo na kolobela yo na mbala moko, bomoni, mpo na kobóndela mpo na yo. Ezali Molimo na Nzambe kobikáká kati na Lingomba, nde esakolaki mpenza oyo Yango ekozala ntango Ekoya. Ekozala kopema ya libela, ya Seko.

⁹² Nzambe asalaki mokili. Baebete, mokapo ya 4. “Nzambe asalaki mokili, mpe apémaki na mokolo ya nsambo.” Ya solo.

Mokolo ya mwambe ezongaki lisusu, na nsé... Apesaki yango na Bayuda lokola kondimana, mpo na ntango moko boye. Ya solo. Kasi bango bakendeke kopema kaka mokolo moko; bazóngi, na mokolo ya liboso ya mpóso, babandi lisusu, ya sika, babandeli lisusu. Oyo wana eza kopema oyo Nzambe alobelaki te.

Ntango Nzambe asalaki mokili na mikolo motoba, ntango Akendeke kopema, Apémáki kobanda wana. Ya solo. Likambo esilaki nye. Azongaki na mokolo ya mwambe te mpo na kobandela lisusu.

⁹³ Ezalaki kaka elílingi. Sikoyo, oyo wana ezalaki etaliseli, lokola sánzá mpo na moi; kasi ntango mói ebimaka, tozalaka lisusu na bosenga ya sánzá te. Sikoyo, bótala likambo oyo, oh, na Emoniseli 11: “Mwasi yango ná sánza na nsé ya makolo na ye, mpe mói na motó na ye.” Oh, tokokaki kokende na kati ya Biblia nyonso, kobanda na ezipeli kino ezipeli, mpe kotalisa bino yango. Bomoni?

⁹⁴ Kasi yango ezali nini? Na ntango oyo, Biblia elobi, na Baebete mokapo ya 4, ete: “Soko Yesu ápésaka bango mokolo ya kopema, Alingaki kolobela yango lisusu te nsima na yango;

Alingaki kolobela mokolo ya kopema.” Mokolo nini ya kopema Ye alobelaki?

Bóya epai na ngai, bino nyonso oyo bolembi mpe bozali na mikumba, mpe nakopesa bino kopema.

⁹⁵ Matai, mokapo ya 11, molongo ya 22... Bótala, bongo, tomoni ete ntango toyei epai na Ye. “Mpo ye,” elobi Baebele 4, “oyo akoti na kopema ya Yesu apemi na misala ya mokili, lokola Nzambe apemaki na oyo na Ye,” ntango asalaki mokili, mpo na kobandela yango lisusu ata moke te. Kino ntango nini? Botiami elembo ya Molimo Mosanto kino ntango nini? “Kino na mokolo ya lisiko na bino.” Wana nde kopema yango, kobondisama, Molobeli, elembo, Mokangoli. Oh! Nakómi lokola moto oyo amemami, to nakómi lokola moto oyo apambolami. Oh!

⁹⁶ “Elakami nde mpo na biso, Ndeko Branham? Etalisami polele na Biblia?”

Malamu, tókende na Yoele, mpo tómona oyo Yoele alobaki mpo na Yango.

Nazali kozongisa mpenza matondi mpo na Liloba lipambolami ya Nzambe! Bolingaka Yango? Nakanisi ete soko ezalaki mpo na Liloba te, nayebi te esika nini tolingaki kozala. Malamu.

Tozali na Yoele sikoyo. Tokozua Yoele, mokapo ya 2 ya Yoele, mpe tokobanda na molongo ya 28. Yoele 2:28, mibu nkama mwambe liboso ya boyei ya Klisto, mosakoli akotaki na Molimo. Sikoyo, bóyoka.

Mpe ekojala nsima na yango, ete nakosopa Molimo na ngai likoló na njoto nyonso; . . . bana na bino babali mpe bana ya basi bakosakola, mibange na bino bakolota bandoto, mpe bilenge na bino bakomona bimononeli:

Mpe ata likoló na basalina ngai ya mibali mpe likoló na basali na ngai ya basi, nakosopa na mikolo oyo . . . kosopa na mikolo wana, ya molimo na ngai.

Mpe nakotalisa bikamwa na likoló, na likoló, mpe na mabelé, makila, . . . móto, mpe makonzi ya molinga.

Moi ekobongwana molili, mpe sánzá ekobongwana makila, liboso na koya na mokolo monene mpe . . . ya somo ya Yawe.

Mpe moto nyonso oyo akobelela nkombo na Yawe akobikisama:

⁹⁷ Wana ezali . . . Oh! Nini? Yoele! Bomonaki yango? Na Misala 2, Petelo azuaki molongo yango moko. Alobaki: “Bino bato ya Yisraele, bóyoka maloba na ngai. Bato oyo balángwe te,” baoyo batiami elembo, babóndisami, batiami pembeni, batiami elembeteli. “Balángwe te, ndenge bozali kokanisa,” Misala 2, “mpo ezali ngonga ya misato na mói. Kasi oyo ezali likambo oyo

Yoele mosakoli alobelaki: ete: ‘Na mikolo ya nsuka, Nakosopa Molimo na Ngai likoló na nzoto nyonso.’”

⁹⁸ Ezali Nini, Molimo Mosanto ezali nini? Malamu, sikoyo tótala lisusu ete elakamaki na bandimi, oyo wana nde oyo Yango ezali. Sikoyo, Molimo Mosanto oyo, tokomona oyo Yango ezali, na ntango moke. Na banani Yango elakami? Na bandimi.

Sikoyo, tókende na Luka, mokapo ya 24 ya Luka, bóyoka eloko nini Yesu alobaki na Maloba na Ye ya nsuka, liboso álongwa na mokili. Luka, mokapo ya 24. Mpe bino baoyo bozali kokoma yango sikoyo, bokoki kokoma yango, na nsima, bóyekola yango lobi ntango bokozala na ngonga mingi. Sikoyo, Luka 24:49, bóyoka Yesu koloba. Na nsuka, ntango Azalaki komata na Nkembo, na komata, Maloba oyo Ayebisaki bayekoli na Ye, yango oyo.

. . . tala, nakotinda elaka ya Tata na ngai. . .

Elaka nini? Elembo, elembeteli, Mobóndisi, ná makambo nyonso oyo nauti koloba, mbala nkóto na nkóto koleka.

. . . nakotindela bino elaka ya Tata na ngai: . . .

Elaka nini? “Oyo Yisaya alobaki ete ekoya: ‘Na nzela na bibebu ya likukuma mpe minoko mosusu nde Nakoloba na bato oyo.’ Nakotindela bino kopema yango. Nakotinda oyo Yoele alobaki, ete: ‘ekosalema ete, na mikolo ya nsuka, Nzambe alobi, Nakosopa Molimo na Ngai likoló na bino’. Oh, Nakotindela bino, mpe Nakokómisa bikólo nyonso, mabota nyonso, kobanda na Yelusaleme. . . Nakokotisa momboto ya Abraham na kondimana oyo. Nakotia bango nyonso elembo. Bomoni, Nakosopa Molimo na Ngai.”

. . . Nakotindela bino elaka ya Tata na Ngai: kasi bino bótíkala kaka, elingi koloba, bózela na engumba ya Yelusaleme, kino ntango bokolatisama na nguya uta na likoló.

⁹⁹ Na bongo, Molimo Mosanto ezali nini? “Nguya uta na Likoló!” Nguya uta na episkopo te, nguya uta na lingomba te. Kasi “Nguya uta na Likoló!”

¹⁰⁰ Nguya yango eyaki ndenge nini? Na “kokomáká moto ya lingomba”? Nabeti mondenge bósala yango, bóloba ete ezali bongo. Na “kokótáká na lingomba, kopesáká mbote ya loboko na motei”? Te misié. Sikoyo, mpo na bino ba-Katoliko, “kobimisáká lolémo mpo na kokúla komúnio ya yambo”? Te misié.

¹⁰¹ Eyaki lolenge nini, Nguya kouta na Likoló? Tótánga lisusu mwa mosika. Tókende na Misala 1:8. Bazali kosangana elongo sikoyo. Sikoyo, bazalaki koloba na ntina na Yesu, awa, ntango basanganaki elongo, mpe basilaki kotia moto mosusu na esika ya Yuda. Misala 1:8.

Kasi bokojuwa nguya, nsima na oyo Molimo Mosanto koya likoló na bino: . . .

Nini? “Bokokóma bandimi ya Branham Tabernacle”? Te. “Bokokóma bandimi ya lingomba Metodiste, ya lingomba Katoliko, ya lingomba Presibiterien”? Ezali bongo te, na kati ya Biblia. Oyo wana ezali malakisi esalemi na bato.

“Kasi bokozua Nguya nsima na yo kokóma motei”? Te, misié. “Bokozua Nguya nsima na kozua Diplóme ya Graduat”? Te, misié. “Bokozu- . . . Nguya ekoya nsima na bino kozua Diplóme na bino ya Bonzambe”? Te, misié. “Bokozua Nguya nsima na bino kozua libatisi na mai”? Te, misié. “Bokozua Nguya nsima na kokúla komúnio ya yambo”? Te, misié. Bomoni, nyonso wana ezali makambo esalemi na bato.

¹⁰² Bóyoka oyo Biblia elobaki, oyo Yesu alobaki.

. . . bokozua nguya, nsima na wana Molimo Mosanto koya likoló na bino: (Molimo Mosanto ezali nini? Nguya) bongo, nsima na likambo oyo, bino bokozala batatoli. . . (“Kaka bino zomi na mibale, bokotatola na Yelusaleme”?) . . . bino bokozala batatoli mpo na ngai na Yelusaleme, . . . Yuda, . . . Samalia, mpe kino na bisika mosika mpenza na mokili. (Bisika oyo bato batikálá kokóma naino te.)

Mpe esilaki ye koloba makambo oyo, . . . esilaki ye koloba makambo oyo, wana ejalaki bango kotala ye, anétolamaki na kati ya lipata mpe ebombaki. . . na miso na bango.

¹⁰³ Sikoyo bóbalola semba na ngambo ya lokasa yango, bótala ndenge masakoli yango ezali kokokisama.

Mpe wana mokolo ya Pantekote esilaki koya, bajalaki na moko. . . bango nyonso bajalaki elongo na esika moko.

“Mpe na mbala moko, mobateli akotaki mpe. . .”? Nabimaki libanda na molongo, na esika wana, boye te? “Na mbala moko sángo amataki na etumbelo”? Te.

Na mbala moko, lokito moko eutaki. . .

Ezalaki te lokola kondima moko ya komisalela; Ezalaki wana, lokito.

“Motei moko azalaki kobeleva na ekuke”? “Sángo azalaki na komúnio, autaki na esika ya búlee”? Te, eloko moko te ya ndenge wana.

. . . lokito moko eutaki na likoló. . . (Mwa makeléle ya matambe te) . . . lokito moko eutaki na likoló, lokola . . . kopepa na mopepe makasi (Oh, la la! fiou! . . . ? . . .) . . . mpe etondaki na ndako mobimba epai bafandaki.

¹⁰⁴ Molimo Mosanto ezali nini? Nde epai oyo bazuaka Nguya. Nde epai oyo basengeli kozela; nde likambo oyo esalemaki ntango basalaki bongo. Nyonso esakolamaki, kobanda na

Genese kokoba, kobanda na Abraham kokoba kino lelo; Esengelaki koya, mpe lolenge oyo Esengelaki koya, mpe mbano esengelaki koya. Ezali nini? Elakamaki na lingomba, mpo na bandimi.

. . . mpe *etondaki na ndako mobimba, epai bafandaki.*

Ndemo lokola. . . mótó emonanaki na bango, ekabwanaki, mpe efandaki likoló na moko moko na bango.

Mpe bango nyonso batondaki na Molimo Mosanto, mpe babandi koloba minoko mosusu, ndenge Molimo apesaki bango maloba.

Sikoyo, tokolobela yango mokolo ya Mitano na mpokwa. Tokotika yango wana, bomoni.

¹⁰⁵ Lolenge nini Yango ezali? Ezali elaka epai na Lingomba, elaka mpenza. Malamu.

¹⁰⁶ Sikoyo, sikoyo tokomona, nsima na bango kotondisama, batiamaki elembo mpo na ntango boni? [Losambo balobi: “Kino na mokolo ya lisiko.”—Mok.]

Bato boni awa bazali na Molimo Mosanto? Bótombola maboko. Baoyo bazali na Molimo Mosanto bazali mingi, koleka baoyo bazangi. Tolingi ete ókóma moko na biso, ndeko mobali, ndeko mwasi. Ntango osósoli oyo Yango ezali, Ezali. . . Ezali Molimo na Nzambe nde efándi na kati na yo, mpo na kosala misala ya Nzambe.

Ntango nyonso oyo Nzambe azalaki kotinda Molimo na Ye na moko na basali na Ye, na moko na basakoli na Ye, na moko na balakisi na Ye, na moko na bantóma na Ye, bazalaki koboyama ntango nyonso na mokili. Bazalaki komona bango lokola bato ya magbóma, na bileko nyonso oyo ezalaki. Ata ntango Paulo atelemaki liboso ya Akalipa, alobaki: “Na nzela oyo ebiangami lipengwi. . .” *Lipengwi* ezali nini? “Ligbóma.” “Na nzela oyo bazali kobenga ligbóma, bato ya libóma, lolenge wana nde nasambelaka Nzambe ya batata na biso.” Naza na esengo mingi ya koloba ete naza moko na bango. Iyo, misié. Ya solo. Naza na esengo mingi ya koloba ete naza moko na bango.

¹⁰⁷ Sikoyo, nsima na Molimo Mosanto kokita likoló na bango, Esalaki ete bálingana mingi mpenza kino biloko na bango nyonso ezalaki elongo. Ezali solo? Oh la la, oh la la bondeko nini oyo! Toyembaka loyembo yango mbala mosusu: “Oh, bondeko nini oyo! Oh, esengo ya Bonzambe mpenza!” Nde yango. Bazalaki komitungisa te, bazalaki komitungisa te, soko mó—mói ebimaki to te. Bazalaki na bango kosenga te makambo nyonso ezala petee.

“Sikoyo, nakozua Molimo Mosanto,” ndenge bato mosusu balobaka na ngai, “Mr. Branham, soko okopesa ngai ndanga ete nakokóma millionnaire, soki okopesa ngai ndanga ete nakozua

mabulu ya petrole, mpe soki nakozua mabulu ya wólo, mpe na—na. . .” Bomoni, bato bateyaka makambo wana, mpe bateyaka lokuta. Nzambe alakaki makambo wana te.

¹⁰⁸ Moto oyo atikali kozua Molimo Mosanto, amitungisaka te soki akozala kolomba lipa to te. Esalaka na yango bokeseni moko te epai na ye. Azali ekelamo oyo azali kokende na Lola. Azali te. . . Azali na ekanganelo ata moko te awa. Ezali solo. Amitungisaka te. Tika oyo ekoya, éya. Bato bátóngá, bátiola. Óbungisa lokumu na yo, ekosala yo nini? Ozali na nzela kokende na Nkembo! Aleluya! Miso na yo ezali kaka kotala Klisto, mpe ozali na nzela na yo. Oyo mokili ekoloba, etali yo te.

Yango nde oyo Molimo Mosanto ezali. Ezali Nguya, Ezali elembo, Ezali Mobóndisi, Ezali Molobeli, Ezali elembeteli. Oh, la la! Ezali endimiseli ete Nzambe asili kondima yo.

Nasili kozua ntango boni? Natikali kaka na miniti mwambe. Malamu. Tika ná. . . Nazali na Makomi ebele awa. Nabanzi te ete nakokoka kokotisa yango, kasi toko—tokosala makasi.

¹⁰⁹ Sikoyo, nsima na moto kotóndisama na Molimo Mosanto, ekoki kosalema ete minyoko ná makambo mosusu, ésala ete ázonga nsima mpe. . . Sikoyo, akobunga te, azali kaka mwana na Nzambe, akozala yango ntango nyonso, mpo otiami elembo mpo na ntango boni? [Losambo balobi: “Kino na mokolo ya lisiko.”—Mok.] Ezali solo. Yango nde oyo Biblia elobaki.

¹¹⁰ Sikoyo, nsima na bayekoli kobetama fimbo, bayokisamaki nsoni, batiolamaki, mpe nyonso wana, bakanisaki ete ntango ekokaki mpo na kosangana lisusu mwa moke. Tóbalola na—na Misala, mokapo ya 4, mpo tómona ntango bango. . . nini esalemaki. Sikoyo, oyo ezali mpo na bino baoyo bozali na Yango. Misala, mokapo ya 4.

Sikoyo, Petelo ná Yoane babétamaki fimbo, babwakamaki na bolóko, mpo babikisaki mobeli, mpo babondelaki mpo na mobeli na ekuke ya losambo. Bato boni bayebi yango? Mobali moko atandamaki wana, azalaki lokola ebósono. Azalaki kokoka kotambola te; azalaki bongo mibu ntuku minei. Mpe Petelo azalaki koleka wana. Mpe alobaki. . . asembolaki kopo na ye, mpo na koyamba eloko moko na kopo na ye, mpo ákoka kolia.

Mpe Petelo atalisaki ete azalaki motei oyo atondisami na Molimo Mosanto: azalaki na mbongo te. Alobaki—alobaki: “Paláta mpe wólo, nazali na yango te.” Bomoni, azalaki na ntina na yango te. Kasi azalaki e—ekelamo ákokende na Lola. Oh, elingaki kozala malamú soko tozalaki na ntango mpo na koumela likoló na yango, mwa ntango, bomoni. Azalaki kokende na Lola. Abondisamaki. Azalaki na Molimo. Azalaki na Nguya. Apusanaki mpe alobaki: “Paláta mpe wólo, nazali na yango te, kasi oyo nazali na yango, nakopesa yo.”

Na ntembe te mobali yango alobaki: “Ozali na eloko nini, misié?”

“Nazali na kondima. Nazali na eloko moko na motema na ngai oyo ebandaki, eleki mikolo pene na zomi. Nazalaki kuna na eteni ya ndako ya likoló, mpe na mbala moko, bilaka nyonso oyo Nzambe apesaki. . . Natambolaki elongo ná Yesu Klisto mibu misato na ndambo. Nalóbaki elongo ná Ye, kobendáká mbisi. Nasalaki makambo nyonso oyo. Mpe namonaki Ye kobikisa babeli. Na. . . Akobaki koloba na ngai: ‘Tata azali kati na Ngai; kasi ntango nakokende, Akoya kati na bino.’ Boye, nazalaki kososola yango te. Kasi Alobaki: ‘Sikoyo, Nazozela te ete ósosola yango.’”

Makambo yango, basósolaka yango te; bandimaka yango kaka. Nasósoli yango naino te. Mpe koloba na ngai te ete osósoli; mpo osósoli te. Bomoni? Boye, nakoki kosósola Yango te, nakoki kolimbola Yango te; kasi, eloko kaka moko oyo nayebi, ezali ete nazali na Yango.

“Malamu, malamu,” okoloba, “elongobani na zebi te.” Oh, ezali bongo mpenza.

¹¹¹ Bótala ba-polé wana. Ntango Benjamin Franklin asimbacki yango, alobaki: “Nazui yango.” Ayebaki te oyo azalaki na yango, kasi azuaki yango. Mpe nalingi ete moto moko áyebisa ngai, na mpokwa oyo, nini oyo lotilíki ezali. Bayebi naino te oyo yango ezali, kasi tozali na yango. Amen. Ya solo. Moto moko te ayebi oyo lotilíki ezali. Bakoki kosalela yango, kopelisa yango, kokomisa yango pole, kosalisa yango mosala. Kasi e—epelaka kouíta na ba-generateur, biteni mibale ezobaluka elongo, ndenge *wana*. Ebimisaka yango, mpe yango nde nyonso oyo bayebi. Epesaka polé, mpe ezali na nguya kati na yango.

¹¹² Mpe ezali lokola Molimo na Nzambe. Ntango ozali na eteni moko, ezali yo, mpe eteni mosusu ezali Nzambe; mpe tambusa yango elongo, *boye*, ekosala eloko moko mpo na yo. Ya solo. Ekopesa Polé. Ekopesa Nguya. Oyebi te oyo Yango ezali, mpe okotikáláká koyeba te oyo Yango ezali, kasi, okoyeba ntango ozali na Yango. Yango nde eloko moko ya solo mpenza. Mpe Ezali mpo na yo. Ezali ya yo. Ezali endimiseli. Ya solo.

Polé *wana* etalisaka nini? Ezali na endimiseli. Ezali pole.

Sikoyo bótala likambo oyo. Sikoyo, boyebi te eloko nini Yango ezali.

¹¹³ Kasi bato wana balobaki: “Malamu,” bazalaki na. . . balobaki likambo moko oyo bayebi, “toyebi ete bazali bayíngá.” Bamosusu “ligbóma,” bomoni, lokola elenge mobali ya Allemand wana alobaki ete azalaki yango. Bomoni? Balobaki: “Bazali bayíngá mpe batángá te. Kasi bazalaki elongo ná Molóbi-mbisi wana, Mosali ya mabaya wana, kuna, abengami Yesu, ya solo mpenza, mpo bazali kosala makambo ndenge moko ná Ye.”

¹¹⁴ Yango nde oyo Molimo Mosanto ezali, ezali Yesu kobikáká kati na molóbi-mbisi moko ya moyíngá, mosali ya mabaya, to moto nani mosusu, motei ya moyíngá, ézala ata nani. Ezali

moto oyo alingi kozala moyíngá na makambo ya mokili, mpe atiki ete Yesu ákota na kati na ye, Molimo na Nzambe, elembo, Mobóndisi. Azali na ntina te ya kozua lokumu; eloko bobele moko oyo ye alingi ezali Nzambe.

¹¹⁵ Ntango Nzambe azalaki kotia makambo na molongo, Alobaki: “Bino nyonso Balewi, Nabengaki bino mpo na kokómisa bino banganga-nzambe. Mpe bandeko na bino nyonso, bamosusu, mabota zomi na mibale ná . . . mabota zomi na moko mosusu bakofúta bino moko na zomi.”

“Soko bozui kitúnga libwa ya mbuma ya pomme, bósopá kitúnga moko mpo na Balewi. Soko bozali kolekisa ba-mpate na bino awa na—na ekuke, bózua mpate ya zomi. Ézala ya mwana to ya mokólo, oyo ya monene to oyo ekóndá, oyo wana ezali mpo na Balewi.

“Sikoyo, bino Balewi, soko bozui nyonso oyo, bongo bino mpe bokopesa moko na zomi epai na Yawe. Bokopesa likabo ya koningisa, mbeka etombolami, mbeka ya ndenge na ndenge. Bokopesa moko na zomi na Yawe.”

¹¹⁶ Alobaki: “Mose, mpo na eteni oyo ya yo, Ngai nde eteni na yo.” Oh, la la! Alobaki: “Nazali eteni na yo oyo esepelisaka.”

Mpe yango nde oyo Molimo Mosanto ezali mpo na Lingomba lelo. Paláta mpe wólo, nazali na yango te, kasi nazali na Eteni oyo esepelisaka. Aleluya! Mayele ya kelasi, natangaka na mpasi Buku oyo, kasi nazali na Eteni oyo esepelisaka. Ezali malamú. Diplóme ya Doctorat, naza na yango te; ézala diplome ya Ph.D to Doctorat en Droit, to eloko mosusu te. Kasi ezali na eloko bobele moko oyo nazali na yango, ezali Eteni oyo esepelisaka. Yango nde eteni oyo ngai nalingi. Yango nde eteni oyo Nzambe alingi ete bózala na yango. Bóbwaka biloko mosusu nyonso ya kala oyo mosika, lokumu nyonso ná makambo nyonso mosusu, mpe bóya kozua Eteni ya Nzambe, oyo esepelisaka.

¹¹⁷ Mpo ete, biloko ya mokili oyo ozali na yango, okotika yango awa ntango okolongwa. Kasi soki ozali na Eteni wana oyo esepelisaka, Ekomema yo na likoló, ya solo mpenza. Tozalaka ntango nyonso kozua mikanda ya assurance, lelo, mpo na kopesa na mokundi bibembe. Tika ete tózua Eteni ya Nzambe oyo esepelisaka, mpe tózua Momemi-na-Likoló, na esika ya mokundi-bibembe. Boyebi, yango nyonso mibale esalaka.

¹¹⁸ Sikoyo tótala.

. . . nsima na kobimisama, bakendeki epai ya bato na bango moko, . . .

Bazongaki epai ya banganganzambe te. Bomoni, ezalaki kotalisa ete bazalaki na Yango. Balingaki kozonga na makambo ya kala wana te, ya malili mpe ya momesano, te; kozonga mpe koloba: “Sikoyo bótala makambo oyo basali na biso!” Te, te. Bazalaki na baninga na bango moko. Bazalaki kaka bato pene

na zomi na mibale kuna, kasi ezalaki baninga oyo bakoki, bato moke mpenza.

. . . nsima na kobimisama, . . .

Nsima na kobeta bango fimbo mpe kokánela bango, balobaki: “Soko botikali lisusu kobatisa na Nkombo na Yesu!” To, oh, nalingaki koloba . . . Malamu, ezali solo. Bomoni? “Soko botikali lisusu koteya na Nkombo na Yesu, soko bosali ata eloko nini, tokozua bino!”

¹¹⁹ Bango balobaki: “Whaou, ezali mpenza maloba ya kokánela. Tókende epai ya bandeko oyo batikali.” Oh, lolenge wana nde esengeli kosala. Makasi ezalaka na bomoko. Bomoko epesaka makasi. Balobaki: “Tókende epai na bandeko oyo batikali mpo tótala eloko nini tokoki kosala.”

¹²⁰ Sikoyo, bango nyonso bayaki elongo mpe bazalaki kosolola makambo oyo babikaki.

. . . nsima na kobimisama, bakendeki epai ya bato na bango moko, Mpe bayebisaki makambo oyo banganga bakonzi mpe bampaka balobaki na bango.

Ntango bango bayokaki bongo, batombolaki mingongo na bango na bomoko mpenza epai ya Nzambe, . . .

Sikoyo bóyoka ndenge balobaki. Bótala ye malamu, bótala bango malamu, bazongaki te mpo na koloba: “E . . .” eloko moko lokola: “E Nkolo, limbisa ngai . . .” Te. Basilaki kobikisama. Basilaki kotóndisama na Molimo. Basilaki kozua Bomo ya Seko.

. . . batómbolaki mingongo na bango . . . na bomoko, mpe balobaki: Nkolo, ojali Nzambe . . .

Amen! nasepelaka na yango mingi, Ndeko Palmer. Nasepelaka na yango.

. . . ozjli Nzambe (toyebi yango) oyo asalaki lola, mpe mabelé, mpe mbu, mpe nyonso oyo bijali na kati na yango,

Yo nde, na monoko ya mosali na yo Dawidi . . . olobaki, . . .

¹²¹ Sikoyo bótala malamu, bokozonga mpe bokoloba: “Sikoyo, tozali te na . . .” Sikoyo okei kuna mpe olobi: “Malamu, sikoyo, Nkolo, zela naino miniti moke awa. Bazali kotiola ngai mingi mpenza!” Alobaki te ete bakosala yango?

“Baoyo nyonso babikaka bomoi ya búlee kati ya Klisto Yesu bakonyokwama.”

“Kasi, oyebi, mokonzi na ngai ayebisaki ngai ete soko akangi . . .” Balobaki te ete bakoloba bongo? “Kasi, oyebi, bamemaki ngai na esambiseli, mokolo wana, mpo na Yango.”

¹²² Ye Alobaki te ete: “Bakomema bino liboso na bakonzi mpe bayángeli mpo na Nkombo na Ngai. Bómitungisa te mpo na

oyo bokoloba, mpo bino nde bokoloba te,”? Namonaki yango kosalema lobi. “Molimo Mosanto oyo afandi na kati na bino; Ye nde akoloba.” Bomoni, “Ye”. Ya solo. Malamu. “Bómitungisa te mpo na oyo bokoloba.”

Nkolo, na nzela na . . . Yo nde, na nzela . . . monoko ya mosali na yo Davidi olobaki: Mpo na nini bapakano bangali, mpe bato babanzi likambo na mpamba?

Bakonzi ya mabelé batelemi, mpe ba-nkumu . . . bayangani mpo na kotelemela Nkolo, mpe kotelemela Klisto na ye.

. . . mpo na solo, Nkolo, mpe kotelemela mwana na yo mosantu Yesu, oyo yo osili kopakola, Elode, ná Ponti Pilata, mpe bato ya Mabota, mpe bato ya Yisalaele, . . . bayangani elongo,

Mpo na kosala nyonso oyo loboko na yo mpe mokano na yo ekanaki liboso, ete ekosalema.

Oh, la la! Nasepelaka na yango. “Nkolo, bazali kosala likambo mpenza oyo Olobaki ete bakosala.” Biblia elobaki nini? “Na mikolo ya nsuka, baseki bakozala; bato ya motó makasi, bavimbi na lolendo, balingi bisengo koleka Nzambe; bazangi boboto, batongi, bazangi komipekisa, bayini na bato malamau; bazali na lolenge ya kosambela, kasi bazali kowangana . . .” Bango batikala komata ata moke te kuna na likoló mpo na kozua Nguya: “. . . nsima na oyo Molimo Mosanto ekoya likoló ná bino”. “Bazali na lolenge ya kosambela, kasi kowanganaka nguya na yango: tángwa mosika na bango.” Wana nde oyo Molimo Mosanto ezali. Bomoni?

. . . makambo oyo ekánámí . . . ete ekosalema.

. . . sikoyo, Nkolo, tálá makáneli na bango, mpe—mpe pesa na basali na yo, makoki ya biso kosolola liloba na yo na mpiko nyonso,

Oh, nasepelaka na yango! Longola mwa mokuwa ya soso wana, mpe tia mokuwa ya mokongo mpenza wana. Sikoyo bó тала awa.

. . . tókoka kosolola maloba na yo,

Naino ejali yo kosembola loboko na yo mpo na kobikisa; . . .

Oh, ndeko! Milimo mabe ekufaka te, kasi Molimo Mosanto mpe ekufaka te. Bomoni?

. . . kosembola loboko na yo, mpo na kobikisa; . . . ete bilembo mpe bikamwiseli ésalema na nkombo ya mwana na yo mosanto Yesu.

Bomoni mpo na nini bazalaki kowelana, boye te? Bazali kosala ndenge moko lelo, kasi ekosunga ata moke te.

Ntango basilisaki kobondela, esika eyanganaki bango eninganaki; bango nyonso batondisamaki na Molimo Mosanto, mpe...basakolaki Liloba na Nzambe na mpiko nyonso.

¹²³ Fiou! Oh la la! Bazuaki eloko moko ntango bamataki kuna na likoló, boye te? Elaka yango elobaki ete yango nde Molimo Mosanto ezali, mpo na kopesa bino mpiko, mpo na kopesa bino kobóndisama, mpo na kotia bino elembo, mpo na kopesa bino elembeteli. Oh, la la!

¹²⁴ Bóyoka. Oh, nalingaki kosepela tózala ata na ntango, tokokaki kokende elongo ná Filipino epai ya Basamalia. Na Misala 8:14; bino nyonso oyo bozali kokoma yango. Basilaki kozua esengo monene, basilaki kozua kobikisama na nzoto mingi, kasi babatisamaki na Nkombo na Yesu Klisto. Kasi batindaki bato na Yelusaleme, mpo bázua Petelo; ayaki mpe atielaki bango maboko, mpe bazuaki Molimo Mosanto. Misala 8:14.

¹²⁵ Bato ya Mabota, moko na bango, nkombo na ye ezalaki Koloneli. Azalaki moto ya malamumu mingi, azalaki kofuta moko na zomi, atongelaki bato ba-sinagoga, azalaki komemia Nzambe, azalaki kobanga Nzambe; moto malamumu, Presibiterien, Metodiste, Batiste moko ya malamumu, to eloko moko to mosusu, bomoni, moto malamumu mpenza. Kasi mokolo moko, Nzambe alobaki: “Azali moto malamumu; boye, Nakotinda ye na liyangani moko. Nasengeli kobengisa motei na Ngai awa mpo ásolola na ye na ntina na Yango.” Malamumu.

Na bongo amonaki emononeli, elobaki: “Kende na Yáfo, mpe okomona moto moko kuna, nkombo na ye Simona, mosali na mposo ya nyama. Mpe moto moko azali kuna, Simona Petelo. Bengisa ye awa; akoyebisa yo lolenge ya kosala, mpo asili kozua eloko moko.”

¹²⁶ Wana Petelo azalaki kuna...Mpe Koloneli alingaki kokumbamela motei yango. Alingaki mpenza...Kasi Petelo alobaki: “Telema. Naza moto lokola yo.”

“Mpe wana Petelo azalaki naino koloba Maloba yango,” na lolenge oyo bazongaki, na ebandeli...Kaka makambo oyo nazolobela, ndenge Nzambe alakaki ete Akosopa Molimo Mosanto. “Wana ezalaki ye koloba Maloba yango, Molimo Mosanto ekitaki likoló na bango.” Fiou! Iyo. Yango nde oyo Molimo Mosanto ezali, na moto oyo Yango etindami. Ya solo mpenza. “Mpe bango nyonso batondisamaki na Molimo Mosanto.”

¹²⁷ Sikoyo bótala na Baefese, ndeko moko ya Batiste azalaki kuna. Azalaki liboso moto na mobeko, moto na mayele, ya boyebi, ayebaki mobeko; moto monene, ya mayele mingi. Mokolo moko abandaki kotánga Biblia, mpe amonaki ete moto moko akoya na nkombo ya Masiya. Mpe nsima na yango, ee, akomaki koyoka bato koloba na ntina na Yesu yango, mpe alobaki:

“Nandimisami. Mpe natatoli kondima na ngai polele, ete Yesu azali Klisto, Mwana na Nzambe.” Azalaki Batiste moko ya solosolo. Ye wana, azalaki kotambola: “Nazotatola polele ete Yesu azali Klisto.” Akómaki kosala yango mingi mpenza na lolenge ete Nzambe abengaki ye na lotomo. Nzambe akoloba ntango nyonso na motema ya sembo.

¹²⁸ Mpe batongi héma moko bazalaki kuna, nkombo na bango Akila mpe Prisile, mobali ná mwasi. Bazalaki batongi héma. Misala, mokapo ya 18, nde elobi yango. Bazalaki baninga ya Paulo. Basilaki kozua Molimo Mosanto na maboko ya Paulo mpe na malakisi na ye.

Bayokaki ete kolamukisa moko ezali kuna, na bongo bakendeke kuna. Bato bazalaki kaka pene na zomi to zomi na mibale kuna. Na bongo, akendeke kuna mpo na kotala yango, mpe ayokaki motei yango koteya, bosomebo ya motema na ye. Alobaki: “Boyebi, nandimi ete akolinga koyoka Solo.”

Na bongo, nsima na losambo kosila, abengaki ye na nsima ya héma, mpe alobaki: “Tala, tozali na elenge ndeko moko ya molai awa, Moyuda moko ná zolo egumbámá, mpe, kasi ntango akoya awa, akoteya yo malakisi ya Liloba ya Nzambe, polele.” Malamu, nsima na mwa ntango . . .

¹²⁹ Paulo azalaki na boloko na ntango yango. Esika moko ya nsómo mpo na motei ya makambo ya mikolo oyo, boye te? Kasi, azalaki na boloko, mpe Nkolo nde atindaki ye kuna. Boye ntango koningana ya mabelé esalemaki, ekweisaki boloko yango, amemaki mokengeli ya boloko ná libota na ye, mpe abatisaki bango nyonso, na Nkombo ya Nkolo Yesu, mpe akendeke, ayaki kuna.

Mpe autaki kobengana molimo mabe moko na elenge mwasi moko ya solóka, kuna. Mpe, na bongo, bazalaki kosala mbongo mingi na nzela na mwasi yango, boye, Paulo abimisaki sekelé na bango, na bongo babwakaki ye na boloko mpo na yango. Mpe Nkolo akweisaki boloko yango, mpamba te azalaki na bato mingi kuna mpo na koyoka Solo. Liloba na Nzambe, bakoki kokanga Yango te. Ezali na . . . Ata ndenge nini, bokokoka te. Bokoki kosala yango ata moke te.

¹³⁰ Na bongo, akendeke kuna, esika mobali yango azalaki. Mpe Akila na Prisile, ntango mosusu bazalaki na mwa sandwiche. Ntango kaka ntango basilisaki kolia sandwiche, balobaki: “Tokokende na kolamukisa.”

Paulo afandaki wana na nsima, asimbacki mwa nzambala na ye, mpe ayokaki motei ya Batiste oyo koteya.

Alobaki: “Ezali malamumu, likambo otei, kasi ezali na makambo koleka Oyo wana.” Alobaki: “Nazali na motuna ya kotuna yo, Dr. Apollos. Bosílá kozuá Molimo Mosanto utá bondimá?”

“Oh,” alobaki, “toyebaki te soki ezalaka. Olingi koloba mpenza nini, na ‘Molimo Mosanto’? Bisu toza ba-Batiste.”

Alobaki: “Boyebi ndenge nini ete bozali ba-Batiste?” Bomoni?

“Malamu, tobatisamaki. Bisu toyebi kaka libatise ya Yoane.”

Alobaki: “Abatisaki kaka mpo na mbongwana na motema, koloba ete ‘bándimela Ye oyo akoya,’ nde Yesu Klisto.”

Mpe ntango ayokaki bongo, babatisamaki lisusu, na Nkombo na Yesu Klisto. Mpe Paulo atielaki bango maboko, mpe Molimo Mosanto eyaki likoló na bango, mpe balobaki minoko ya sika mpe basakolaki. Alobaki: “Moto nyonso.”

¹³¹ Sikoyo, sikoyo, basalaka yango ndenge nini? Nalingi koyebisa bino likambo moko, na nsima na . . . Tokosilisa, mpo, tokómi, naye bisaki bino ete nakobimisa bino liboso. Boyebi oyo Molimo Mosanto ezali. Lokola Likomi ya nsuka mpo na mpokwa oyo . . . Naticali na biteni mosusu awa, kasi tokosengela kotika yango. Tózua Bakolinti ya Liboso 12. Na bongo tokotángá yango, na nsima nde to—tokosilisa. Malamu. Bakolinti ya Liboso, mokapo ya 12.

Bato boni bandimaka malakisi ya Santu Paulo? Solo mpenza! Alobaki, na Bagalatia 1:8: “Soko Mwanje moko alakisi malakisi mosusu, álakelama mabe,” ézala ata motei. “Soko Mwanje ya Likoló akiti mpe atei malakisi mosusu, álakelama mabe.” Bomoni, bókota na likambo wana te.

¹³² Sikoyo bótala oyo, Bakolinti ya Liboso 12. Boni—bato boni bayebi ete tosengeli kozala na kati ya Klisto mpo na kokende na lisekwa, mpo ezali Nzoto na Ye nde Nzambe alakaki kosekwisa? Nzela mosusu ezali te. Nzela mosusu ezali te, soko ozali libanda na Klisto.

Okoki kotala *awa* na nsima mpe kondima Ye, koloba: “Ya solo, nandimi Ye. Azali Mwana ya Nzambe.” Malamu, ndeko na ngai, nabelemi mpo na kopesa yo mbote ntango olobi bongo. “Nandimeli Ye. Nakoyambola Ye lokola Mobikisi na ngai.” Ezali malamumu, kasi ozali naino na kati na Ye te. “Nakopesa motei mbote. Nakoyámbola masumu na ngai.” Ezali naino na kati na Ye te.

¹³³ Sikoyo bótala malamumu, bótala eloko nini Paulo alobaki, lolenge bakotaka na kati ya Klisto. Ndenge nini okoyebana lokola oyo azui kokatama ngenga? Na Abraham, bapesaka elembo. Bóyoka sikoyo likambo oyo, Bakolinti ya Liboso, mokapo ya 12, tóbanda na molongo ya 12.

Mpo lokola nzoto ejali moko, nde ezali na binama mingi, mpe nyonso . . . binama ya nzoto yango moko, ata mingi, ejali nzoto kaka moko, Klisto mpe ajali bongo. (Akabwani te. “Moko!”)

Bóyoka. “Mpo, na nzela na lingomba moko”? Bato boni bazali kotánga nsima na ngai? “Na nzela na mbote ya loboko”? “Na nzela na mai moko”? Te. Boye, moto moko azali na libunga.

“Na nzela na Molimo moko!” Ezali Nkomá ya monene? Ezali, “Molimo Mosanto,” boye. Bomoni?

. . . na nzela na Molimo moko biso nyonso tobatisami kati na nzoto moko, Bayuda to Mabota, baombo to bansómi; mpe biso nyonso tomelisami na Molimo yango moko.

¹³⁴ Nzoto ya Klisto ezali Molimo moko, epai enámá nyonso, kobanda na Pentekote kino na ntango oyo amelaka Vinyo yango moko ya sika, Molimo Mosanto yango moko, oyo ezali kobota mbuma yango moko. Tosalaka yango ndenge nini? “Na Molimo moko.”

Ezali ekuke polele ya Nzambe, Molimo Mosanto. Ezali nini? Ezali ekuke polele ya Nzambe. Ezali elembeteli. Ezali elembo. Ezali Mobóndisi. Ezali Molobeli. Ezali endimiseli. Ezali kopema. Ezali kimia. Ezali boboto. Ezali lobiko ya nzoto. Ezali Bomoi. Ezali—Ezali ekuke polele ya Nzambe na makambo nyonso oyo. Ezali ekuke polele ya Nzambe, epai na Klisto, oyo ezali . . .

Nzambe atalisaki polele ete Asekwisaki Yesu longwa na bakufi, mpe baoyo bakufi kati na Klisto, Nzambe akoyeisa bango elongo na Ye, na lisekwa. “Bóyokisa Molimo Mosanto mawa te, oyo botiami elembo na Ye kati na Klisto kino mokolo ya lisiko na bino.” Fiou! Bato boni bandimi yango?

¹³⁵ Klisto azali nini? Molimo Mosanto ezali nini? Ezali eloko te oyo bato basekaka. Ezali eloko oyo bato basekaka; kasi ezalaka bongo te, mpo na mondimi.

Mpo na mozangi kondima! Nalingaki kosepela soki nazalaki na mposo mibale to misato, Nakosepela kozua mpokwa ya lobi mpo na koyebisa bino oyo Yango ezali mpo na mozangi kondima. Tika ete násala noki, na ntango moke kaka. Ezali likambo ya liseki. Ezali motámbo. Ezali libanga ya libaku. Ezali liwa. Ezali kokabwana ya Seko ná Nzambe. Nakoki ata kokanisa te na makambo oyo Yango ezali mpo na mozangi kondima!

¹³⁶ Bómikanisela, mbula moko oyo mozangi kondima atiolaki, ezalaki mbula yango moko oyo ebikisaki Noa ná libota na ye. Bomoni? Molimo yango moko, Molimo Mosanto oyo bato bazali kotiola mpe koloba ete ezali “ligbóma, mpe etonga ya bato ya ligbóma, Eza boléma,” Eza eloko Yango moko nde ekonétola Lingomba mpe ekomatisa Yango na likoló, na mikolo ya nsuka; ekomema kosambisama likoló na mozangi kondima. Ya solo. Yango nde oyo Molimo Mosanto ezali.

¹³⁷ Esengo na baoyo. . . Tika ete náloba boye, na bosembo ya motema na ngai. Esengo na baoyo bazali na nzala mpe na mposa na Yango, mpo bakotondisama.

138 Lobi na mpokwa, tokoloba likoló ya lolenge nini, Eloko nini esalaka ntango Eyaka.

139 Sikoyo, bato boni awa bakolinga kozua Molimo Mosanto, mpe balingi ete moto moko ábondela mpo na bino, mpo bómona Polé?

Boyebi “oyo Yango ezali”.

Sikoyo, lobi na mpokwa, tokolobela “oyo Yango esalaka”.

140 Nsima na yango, na mpokwa oyo ekolanda, ekozala “lolenge nini kozua Yango”. Na nsima, tokobenga bato, tokopesa bango malakisi awa, mpe tokokota na biteni ya ndako mpe tokotikala kuna, soko ekozua ntango nyonso kino na Noele, ezali likambo te, kino Molimo Mosanto ekoya. Tokobelema na Yango na mobóko ya makasi ya Biblia. Tokobelema na Yango mpo na kozua Yango kaka ndenge Nzambe alakaki Yango mpe ndenge Ekitaki na ebandeli. Lolenge wana nde tozali awa mpo na kosala yango. Na . . . Ekosala bokesene moko te na oyo moto moko akoloba, tozali . . .

Liloba na Nzambe ezali . . . ezali na esika ya liboso na motema na ngai. Ya solo. Mpe nazali na mposa na oyo Nzambe abombeli ngai. Soko eloko mosusu ya koleka ezali, fungola Lola, Nkolo, mpo mo—motema na ngai ezali polele mpo na yango. Ya solo.

141 Bato boni bazali na mposa na Yango? Sikoyo tómbola loboko, loba: “Bóndela mpo na ngai.” Sikoyo, wana botómboli maboko na bino.

Tata na Likoló, touti koteya malakisi na ntango molai. Kasi Molimo na Yo ezali awa. Ezali na maboko oyo matómbwami sikoyo. Mpe bayebi nini Yango ezali, bayebi nini Molimo Mosanto elingi koloba. Nabondeli, Nzambe, ete liboso liyangani oyo ésila, ete loboko nyonso awa étómbwama kotatola ete basili kozua Yango. Sálá yango, Nkolo.

142 Tobondeli mpo na bango. Tosengi ete Yo ópambola bango, mpe ópesa bango mposa ya mitema na bango. Tala maboko na bango, Nkolo. Balingi Yo. Bazali na mposa na Yango. Bayebi ete bakoki kokende te . . . Lobi na mpokwa, soko Okosunga ngai, Nkolo, tokoki kotalisa yango polele na kati ya Makomi, ete bakonétolama te, zángá Yango. Boye nabondeli, Tata, ete Ópesa bango nzala mpe mposa, mpo ete bákoka kotondisama. Napesi bango epai na Yo sikoyo, Tata. Mpe, kokisa mapamboli yango, wana tosengi yango na Nkombo na Yesu. Amen.

Nalingi Ye, nalingi Ye

Mpo Alingaki ngai liboso

Mpe Asombi lobiko na ngai

Na nzete ya Kalvari.

143 Nalingi koloba boye, liboso tóyemba lisusu. 'Nazali na mposa ya kokutana ná lisanga ya batei mosusu awa na biró, mokolo ya

Mitano na mpokwa, liboso losambo ébanda, bomoni, mokolo ya Mitano na mpokwa. Ngai. . .

Bomoni oyo nazoluka kosala? Kotalisa oyo Yango ezali, lolenge ya kobelema na Yango mpe eloko ya komemia; na bongo, bokoya lokola bakúfi miso te, na kotatabana na likambo. Yango wana natunaki yango ata moke te na mpokwa oyo. Nalingi ete bóyeba nini Yango ezali. Ezali elaka. Eza elembo. Ezali Mobóndisi. Ezali bongo na bongo.

Na bongo, lobi na mpokwa mpe na mpokwa oyo ekolanda, na bongo tokobanda na mbala moko, kobanda wana, kino Éya. etali te ntango boni ekozua; tokotikalala wana kino. Pétola motema na yo. Akotikaláká kosopa Yango na motema ya mbindo te. Zóngá na molongo, milengela, mpe Akopesa yango.

Nalingi Ye, nalingi Ye

Tótombola maboko sikoyo.

Mpo Alingaki ngai liboso
Mpe Asombi lobiko na ngai
Na nzete ya Kalvari.

Mobateli auti koloba, mpe tondimi, ete lobi na mpokwa, tokobanda na ngonga ya nsambo, na esika ya ngonga ya nsambo na ndambo. Mpe ekopesa ngai makoki ya kobimisa bino na ngonga ya mwambe na ndambo, na esika ya ngonga ya libwa na ndambo. Na ngonga ya nsambo na nda- . . . Na ngonga ya nsambo, lobi na mpokwa, banzembo ekobanda. Ngai nakobanda Liteya na ngai na ngonga ya nsambo na ndambo.

Nalingi Ye,

Tóbimisa matambala na biso mpe tópepa yango epai na Ye.

Nalingi Ye

Bókabwana na mimesano ya makambo ya libanda sikoyo!

Mpo Alingaki ngai liboso
Mpe Asombaki lobiko na ngai
Na nzete ya Kalvari.

Malamu, mobateli na bino sikoyo, Ndeko Neville.



MOLIMO MOSANTO EZALI NINI? LIN59-1216

(What Is The Holy Ghost?)

MALAKISI NA NTINA NA MOLIMO MOSANTO

Liteya ya Ndeko William Marrion Branham oyo, eteyamaki liboso na Anglais mokolo ya Misato na mpokwa, 16, na sanza ya Zomi na mibale, 1959, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki mobimba na Anglais. Ndimbola ya Lingala oyo ekomami pe ekabolami na Voice Of God Recordings.

LINGALA

©2023 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org